

東
華
續
錄

東華續錄

同治三十五

臣王先謙敬編

臣張式恭恭校

六月庚午朔沈葆楨奏逆賊汪海洋陳炳汶盤踞陳坊湖坊蔓延火田坂等處五月初三日王德榜派隊接戰殺斃百餘名該逆於初七夜竄向上清宮濂逆畱悍黨萬餘於火田坂一帶爲斷後計王開琳當派勇丁約會王德榜分三路而進該逆憑卡死守我軍以劈山礮轟之一擁而入斃悍逆百餘名王開琳揮令各營直前猛擊自督親兵居中策應擒斬甚夥賊乃大潰我軍追殺七八里又斃賊數百名其分踞柵子峯盛源洞者初九日竄至距貴溪城十餘里之南鄉總兵孫昌國抽派水勇會同總兵戴奉聘及該縣練勇敗之於張家橋十一日又敗之於五里亭見在鉛山境內一

律肅清惟貴溪之盛源洞等處賊尙未退當飭在防諸軍極力掃蕩迅殄逆氛又奏林政揚一股四月二十六日由甯化福村回竄石城之豐田該縣知縣曾繼勳等擊退之該逆仍踞福村僞王宗一股除與侍逆合隊外餘匪復於五月初五六等日竄近廣昌東南邊界知縣彭芝派團勇迎擊該逆遂退入池源山背村中負隅不出見在侍逆大股仍踞崇仁漣聽等逆則在貴溪之南金瀘之北劉典以贛河盛漲兼有彭玉麟水師可恃王文瑞分紮永豐樂安西路可無他慮商同江忠朝席寶田先行圖復崇仁而檄王開琳王德榜會剿漣逆聽逆探聞鮑超初六日由蕪湖周寬世初十日由祁門先後拔營雨多路阻月底方可抵江 上諭議政王軍機大臣等汪陳兩逆經王德榜王開琳等分路猛擊殲斃悍逆多名其分踞柘子峯盛源洞者竄距貴溪城十餘里南鄉經孫昌國

等疊次擊敗而賊尙未退著沈葆楨督飭在防諸軍極力掃蕩毋令盤踞要隘日肆蔓延見在侍逆大股仍踞崇仁漣聽等逆則在貴溪之南金盭之北亟宜及早殄滅楊岳斌日內諒已交卸水師起程赴江著卽星夜前進會同沈葆楨督飭江忠朝席寶田等迅復崇仁毋令逆匪久踞並檄王德榜王開琳會合江軍將漣聽各逆速圖剿滅王文瑞分紮永豐樂安西路雖無可虞而南豐一城日久尙未攻拔其剿辦情形亦未據沈葆楨陳奏殊深馳繫南豐與廣昌宜崇均相毗連若不迅下南豐恐賊氛聯成一片紛竄旁趨愈難收拾著沈葆楨督飭在事文武奮力進攻毋再遲延干咎林正揚一股由甯化福村回竄石城之豐山仍敗踞福村僞王宗一股分黨由甯化之安遠司竄近廣昌復退池源山背村中負隅不出是福建邊防愈形喫緊著左宗棠等督飭康國器一軍確探

賊蹤迎頭截擊徐宗幹懷遵疊次諭旨迅催林文察等飛速內渡
合兵會剿並飭在防諸軍嚴扼要隘其不能得力員弁隨時甄汰
以肅戎行甯化石城一帶逼近汀州廣東邊防不可不先事防維
著毛鴻賓郭嵩燾趕緊籌畫豫爲布置張運蘭一軍仍遵前旨催
令迅速入閩毋再遲延鮑超周寬世等軍據沈葆楨奏兩多路阻
月底方能抵江昨據曾國藩奏鮑超已至九江著該大臣嚴催鮑
超及周寬世全軍迅速援江不得再行遲滯將此由六百里各諭
令知之○辛未諭議改王軍機大臣等前因皖北兵力單薄諭令
富明阿酌派勁兵爲陳國瑞等後路聲援並令富明阿督飭富陞
統帶馬隊馳赴臨淮與克蒙額合軍遇賊東竄茲據富明阿奏稱
楚豫髮捻下竄著由巢縣定遠等處分路直趨則揚防各路均形
喫重且東下河一帶游勇散勇結隊成羣巢湖船隻到處聚泊防

務斷難稍鬆兵力實難遠分等語所奏尙係實在情形陳國瑞一軍日內諒可行抵臨淮如兵力尙單卽著吳棠酌撥姚廣武等軍就近援應徐宿一帶未可空虛卽以清淮防軍爲姚廣武後路聲援揚防之軍兼爲清淮策應著富明阿吳棠督飭各軍聯絡布置互相應援揚防各路兵勇卽著無庸撥赴皖北喬松年卽飭在防諸軍密探賊蹤實力堵遏陳國瑞到臨後著喬松年仍遵前旨會商進兵並稟商僧格林沁酌量調度游兵散勇及新降人眾應聚裏下河一帶巢湖船隻每多生事防範不可不嚴著富明阿飭令派出之孫文友等梭巡盤詰查拏驅逐庶奸宄無從溷迹地方得臻安謐沿江口岸亦著一體嚴查無任匪蹤淆溷江南散勇遣散五十三營每營五七百人不等且多降眾在內著李鴻章於遣散之時妥爲管押毋任逗留滋事該將軍啟行後水陸各防卽著飭

令吳全美等嚴扼要隘妥爲彈壓以靖地方將此由六百里各諭令知之○御史朱澄澗條陳覈保舉慎召募嚴期限行保甲懲貪墨崇節儉六事 上嘉納之○予浙江陣亡在籍道員田祥等建祠○王申諭議政王軍機大臣等楊岳斌奏起程赴江日期並請調員辦理營務各摺片楊岳斌見在江面防剿事宜交提督黃翼升接辦派彭楚漢等率水師四營先往江西省河擇要扼紮該督已於五月二十七日起程取道安慶上駛著卽兼程前進懍遵前旨會同沈葆楨督飭各軍將崇仁貴溪等處賊股次第剿除其鮑超一軍前據曾國藩奏已抵九江將繞出樟樹鎮迎頭遏擊並著該督與鮑超之軍互相聯絡會同夾擊以期盡殄逆氛廓清全境請調之湖北候補道吳炳崑見回湖南湘陰本籍卽著憚世臨飭令該員迅速前往江西赴楊岳斌軍營辦理營務以資得力將此

由五百里各諭令知之○諭滿慶恩慶奏稱將達賴喇嘛送到首
犯吐多卜降巴及色拉寺買巴結巴阿克巴三扎倉各供詞詳覈
雖首從犯眾均經訊明懲治惟吐多卜降巴造意糾眾先奪已革
總堪布人財繼又脅眾拒捕請卽在藏正法又色拉寺僧眾滋事
時有在該寺學藝之僧人深知佛教大體並未附和請將該僧人
滾多爾呼畢勒罕甲木巴勒丹增拉木結以呼圖克圖列名冊檔
每屆帕克巴拉呼圖克圖年班貢期附同呈進貢品仍頒結印敕
俾資遵守及賞加堅隆琿呼圖克圖名號等語吐多卜降巴罪狀
既據滿慶恩慶逐一訊明白應明正典刑至該寺僧既知佛教大
體不肯附和滋事尤應量予恩施以昭激勸惟朝廷既派欽差前
往查辦事件此時福濟景紋尙未到藏若一切刑賞各事宜不候
欽差先行辦結恐無以折服眾心著滿慶恩慶會同崇實賂秉章

福濟景紋悉心籌商先將該犯吐多卜降巴羈禁俟福濟景紋到藏後再行請旨辦理至應行獎敘之滾多爾呼畢勒罕甲木巴勒丹增拉木結等亦俟福濟景紋到藏後再行奏請獎敘原摺一件供詞信函七件著鈔給崇實駱秉章福濟景紋閱看將此由五百里各諭令知之○給事中劉毓楠奏請飭議政王大臣等破除情面力求整頓得旨小人夤緣干進伎倆百出王大臣等膺茲重寄固不能不下士禮賢周諮博訪惟防檢稍疏恐轉以延攬之心啟攀援之漸嗣後當勉益加勉寬以容眾嚴以律身如該王大臣等辦事未能盡洽仍准有言責者據實直陳各部院大臣同受先朝厚恩當激發天良力圖整頓勿得仍前泄沓自蹈愆尤○癸酉諭議政王軍機大臣等官文奏賊趨麻城黃岡派兵會剿擬卽赴黃州督師會國藩奏覆陳近日軍情各一摺逆匪不得逞志於漢

口分股向東北斜趨官文飭富森保等各軍分投截擊黃安黃陂之賊分竄麻城之岐亭等處捻逆亦分股由黃陂所屬之油梓河竄入羅山縣屬之仙花地方又黃安北路之賊分股竄至光山縣屬之薊家河等處成大吉等見將新洲及辛家沖併力攻克水師礮船在黃岡縣境剿退賊匪官文擬卽移營駐紮黃州著卽趕緊馳赴黃州督飭成大吉等馬步水陸各軍認真剿辦將黃麻一帶逆匪悉數殄除無任蔓延他處蘄水等處卽責令梁洪勝等實力固守勿任竄突該逆未嘗一日忘援金陵其停頓不卽東趨必係探聽皖省下游信息欲以捻逆牽制上游便可遂其豕突狼奔之計僧格林沁見已移紮光州蘇克金等馬隊皆在豫境著卽飭令該員等將光羅各境竄匪迅速剿除並嚴防楚匪東竄皖境張之萬當嚴飭各郡縣慎固封守毋令賊再闖入應如何添兵會剿之

處著與僧格林沁會商妥辦皖北之防喬松年須振刷精神豫爲戒備毋徒恃其不來或致臨事掣肘曾國藩見調周寬世一軍移赴皖北並因黃麻距皖較近列城空虛可慮令陳國瑞駐紮壽州該處爲淮南江北適中之地有此勁旅兼可爲廬壽舒六等處遊擊之師所籌均妥著卽飛飭該員等迅速到防毋稍遲誤金陵之賊飛走技窮著曾國藩隨時督同曾國荃相機進剿周歷巡防該處城池雖高且堅但使眞能斷其接濟外援不來內賊不出又寬爲收撫脅從播散告示俾令傳入賊中以破其固結之謀不久定能蕺事該大臣等其愼勉圖之以副企望聞中外匪徒仍有偷濟賊糧食軍火之事著卽嚴飭水陸各軍實力嚴防遇有此等匪船卽行開礮轟擊毋稍姑息曾國藩摺內所稱由李鴻章解到輪船經費銀兩照數收到惟兵數眾多轉瞬卽罄旣願李鴻章統兵來

助復望其攜餉相遺著李鴻章仍遵前旨俟長興克後赴援金陵並令劉銘傳等督帶選鋒先行馳往助剿輪船尾項催令各處趕解接濟安慶大營此外如有可籌之餉仍須寬爲籌畫隨時接濟曾國藩軍營諒該撫必不稍有畛域之見存也黃翼升係簡放新設水師提督所有設官分汛一切事宜卽著該督撫等詳悉定議具奏毋遲將此由六百里各諭令知之○甲戌諭議政王軍機大臣等都興阿奏馳抵定邊察看賊勢軍情請飭撥步隊一摺甯夏待援甚急訥欽所部又不得力都興阿所帶除馬隊數百外僅陳天佑勇丁一千步隊太單難資進剿該將軍請調雷正綰步隊數營並調曹克忠或陶茂林等軍來定助剿自係實在情形第雷正綰與陶茂林新復平涼見已分路進攻蓮花城張家川賊巢以通靜隆一帶大路兼顧蘭垣恐難分兵赴定曹克忠因滇髮各逆擾

及西安又竄向盤屋一帶防勦正當喫緊一時亦未能赴甘都興阿惟當就見有兵力嚴扼定邊一面偵探路徑設法進兵西蒙克西克馬隊已抵定邊桂成亦擬帶兵數百前赴定營都興阿均可酌度調遣惟成師以出惟敵是求若前無可進之路徒將兵勇株守一隅亦非善策都興阿如察看定邊一路未能一時進勦或卽前赴雷正綰軍營合兵一處規復固原以期速援甯夏著與雷正綰妥籌辦理毋誤事機都興阿如赴固原其定邊一帶卽可飭令桂成及陳天佑等嚴密扼紮爲訥欽後路聲援以免疏失慶昫常陞仍當竭力固守以待援師毋稍疏懈劉蓉勦辦滇髮各逆已否悉數殲除如陝事稍鬆卽飭曹克忠一軍迅赴都興阿軍營以厚兵力都興阿因定邊一帶覓食維艱飭令各州縣購運米麪准其作正開銷軍行而糧不隨士卒何由宿飽著沈桂芬督飭地方官

趕緊採辦源源接濟毋令稍有缺乏都興阿所請咨調道員三壽辦理行營糧臺之處著文煜飭令三壽前赴都興阿軍營籌辦訥欽兵勇未經戰陣必應隨時訓練趙延烜部勇能否成軍均著都興阿安速辦理將此由六百里各諭令知之○丁丑雨○諭議政王軍機大臣等李鴻章奏官軍擊退湖州援賊遂克長興縣城並將胡淩等處賊壘踴毀各摺片長興一城爲蘇浙要衝此次援浙各軍竭力攻克實屬異常奮勉惟長興賊首是否劉官方曾否殲斃逆眾有無逃竄他處李鴻章擬親赴長興察看著卽前往督飭諸軍接剿餘匪查明匪首下落覆奏仍將廣德四安之逆首江姓等殲除潘鼎新一軍在胡淩等處獲勝恐其兵力尙單著卽添派勁旅助之務將湖州協力攻克以期蘇浙肅清殄除巨寇另片奏疊奉諭旨助攻金陵並疊准會國藩會國荃咨催會商攻剿本不

敢有畛域之分亦更無嫌怨之迹惟湖州賊股甚眾附城數十里內面面賊壘堵輔等逆百戰狡悍浙軍僅能扼東南兩面其西北瀕臨蘇常湖城未克牽掣兵力不少若令棄湖州而赴金陵恐賊匪乘間內竄窺伺蘇境若會攻金陵復須協勦湖州兵力實有不給礮隊見未練齊將來尙須雇用洋人教習見擬日內由太湖馳赴長興前敵察看軍情賊勢相機調撥仍卽折回蘇城候旨酌奪等語所籌亦係實在情形前竄江皖之賊其勢甚張左宗棠兵力未免爲所牽掣著李鴻章於到長興後卽督軍助攻湖州嚴飭水陸諸軍防賊內竄俟湖州克復蘇常無警再行親統全軍助攻金陵湖州賊多且悍左宗棠務卽督飭各軍會同李鴻章助勦各軍同心努力約期進攻期於一鼓攻拔此城爲蘇浙關鍵若旦晚克復則一勞永逸不獨李鴻章可以全力協克金陵卽左宗棠兵亦

可直注皖南江西東南全局轉移大有把握卽著左宗棠李鴻章悉心妥籌共奏膚功以慰朝廷殷盼曾國藩仍卽督令曾國荃就見有兵力認真防剿如其機有可乘仍督率諸軍奮力圍攻卽或一時不能得手亦必妥慎嚴防毋令竄突俟合兵後再圖剋期攻拔以期事出萬全該督撫等均爲朝廷所倚畀本日覽李鴻章所奏知該督撫等志切同仇毫無成見爲之欣慰更須勉益加勉和衷共濟有厚望焉李鴻章另片奏儘先參將孫家烺訛詐降眾馬文彪銀洋並搜搶難民江義和財物指勒使女等情實屬目無法紀孫家烺著卽革去參將從嚴審訊審明後卽於軍前正法以昭炯戒嗣後如有似此劣弁並著從重辦理無稍姑息將此由六百里各諭令知之○諭勞崇光張亮基奏克復古州廳城請畱周洪印協剿並勞崇光奏克復中甸等廳城疊獲勝仗各摺片雲南逆

同杜汶秀等分踞中甸等處經馬如龍等進剿將中甸維西思茅
威遠各城次第收復並攻克石膏井磨黑等處賊巢剿辦尙爲得
手思茅威遠既克則普洱已成孤立中甸維西既克則大理之賊
益蹙著勞崇光檄飭馬如龍岑毓英及田仲興等各率所部將普
洱大理等城迅圖克復擒斬首逆以期肅清疆圉古州收復情形
與前憚世臨所奏略同該逆由古州苗峒繞出獨山州之霸街入
蒙進踞已賴旁寨中寨和寨擾及荔波縣之三崗地方經楊廷桂
等軍迎剿疊勝賊欲向獨山州屬中安一路直上雞場該處爲上
竄貴州定廣下竄廣西南丹必由之路亟應嚴密堵禦以杜賊蹤
紛竄全祖凱一軍已抵獨山著勞崇光張亮基飭令該總兵扼要
駐紮會同湘粵兩省官軍實力掃蕩以遏該匪紛竄定廣南丹之
路並著憚世臨張凱嵩嚴檄派出之周洪印楊廷桂各軍聯絡聲

援合力夾攻迅殲醜類周洪印因軍糧無從採辦藥鉛亦甚缺乏
拔營撤回楚邊惟見在正當攻剿喫緊之際李逆尙在漏網貴州
僅有全祖凱一軍兵力甚單楊廷桂孤軍深入亦難兼顧若非添
撥勁旅卽無以收聚殲之效著憚世臨飭令周洪印等仍統湘軍
星速馳赴荔波獨山一帶協同剿洗毋誤戎機該營所需糧米藥
鉛等項著勞崇光張亮基設法採辦源源接濟憚世臨亦當竭力
籌措隨時解濟以收飽騰之效將此由六百里各諭令知之○予
浙江陣亡參將向大鵬遊擊周金才等祭葬世職○戊寅諭議政
王軍機大臣等恩麟奏陝西敗匪勾結甘省東路回匪圍攻莊浪
靜甯等城請飭陶茂林迅速援剿一摺莊浪隆靜等處賊匪充斥
恩麟派出防剿各軍尙形單薄自應厚集兵力迅埽逆氛前據雷
正綰奏稱平涼業已攻克擬偕陶茂林分路進擣蓮花城張家川

賊巢先通隆靜大路兼顧蘭垣見在靜甯等城待援迫切曹克忠不能赴甘陶茂林一軍應卽馳赴安會遏賊西竄援勦隆靜等處力解城圍著都興阿雷正綰會商妥辦恩麟嚴飭成桂等協力固守以待援師一面將省城防守事宜盡心籌畫毋稍大意南路軍情責成林之望相機勦辦甯夏回務責令梁生嶽妥爲布置均不可有名無實其蕭永祥所部勇丁因何潰散著恩麟查明具奏將此由六百里諭知都興阿雷正綰並傳諭恩麟知之○諭平瑞奏庫車漢回滋事派兵救援一摺依奇哩奏漢回變亂及庫車失守請派大員統兵會勦並匪竄布古爾地方各摺片覽奏不勝詫異庫車居南路之衝此次漢匪逆回倉卒起事遽將庫車城池竊踞殺害官民其蓄意謀叛決非一朝一夕之故何以該處辦事大臣平日毫無覺察臨時又無備禦以致釀成變亂實堪痛恨平瑞見

派領隊大臣文永統帶旗綠各營前往援救並籌備軍械糧餉以速其行所辦尙屬認真文永本日已簡放庫車辦事大臣卽著帶領援兵迅速前赴庫車一帶相機勦辦惟文永帶兵無多必應添撥勁軍方足以資策應烏魯木齊提督已簡放文祥平瑞可傳知文祥迅赴新任並再撥兵數千卽由文祥帶往喀喇沙爾庫車等處會同文永一軍認真勦辦所有旗綠各營官員兵丁均歸文祥調遣文祥未到以前著暫歸文永調遣惟當乘賊匪初起之時迅圖撲滅規復庫城不准稍有稽延致滋延蔓喀喇沙爾與庫車接壤此時賊匪旣踞庫城復有馬隊數百名竄至布古爾地方肆擾喀境邊防甚關緊要著依奇哩督飭兵弁嚴扼要隘實力防堵毋令東竄一步所謂之士爾扈特和碩特兩游牧蒙古兵二千名並著依奇哩迅催調集來城助勦依奇哩奏已咨平瑞解銀二萬兩

口糧麪三萬斤據平瑞奏僅措解銀一千兩麪一萬五千斤爲數較少仍著平瑞將應解喀喇沙爾銀兩口糧設法源源解濟俾不至有停兵待餉之虞從前新疆用兵回子台吉伯克等率能效命前驅爲國出力此次庫車愛王被執不屈致被戕害實屬深明大義可嘉可憫依奇哩可將其子台吉阿密特善爲拊慰勉其招集所部隨同官軍殺賊報仇庶人人樂爲我用此次起釁根由並薩靈阿等大小文武下落著平瑞等詳查具奏南路軍情緊急常清統轄各城責任綦重著趕緊籌撥勁兵數千前往會剿景廉前有旨令其折回本任未知該員見在行抵何處奎棟署理葉爾羌參贊大臣責無旁貸著卽籌撥兵餉迅速援應並傳知阿克蘇和闐等城辦事大臣等一體嚴防毋得稍有疏懈喀什噶爾雖相距較遠惟該處卡倫時有安集延回匪滋事難保不聲息相通暗中勾

結奎英尙未交卸著督飭在城員弁力籌防範消患未形不可稍存五日京兆之見常清另片請將遣勇一千四百餘名援案免罪等語此項遣勇人數太多恐釋回時中途恃眾滋事必須妥爲料理令其分起陸續遣回或卽擇其勇健可用者籌備口糧令原帶之人帶赴庫車勦賊使功不如使過或於軍務有益著常清斟酌妥辦文祥接奉此旨著卽迅速起程其哈密幫辦大臣明瑤尙未到任該城領隊大臣一缺卽著文祥於協領內揀選明幹可靠者暫行署理將此由六百里各諭令知之○諭依奇哩奏庫車城池失守咨調各路大兵會勦不日卽可到境請飭陝甘督臣迅將戶部奏撥新疆銀四十萬兩內先行動撥銀五萬兩以濟兵食等語此項奉撥新疆銀四十萬兩前經戶部議奏應由山西巡撫籌款撥解見在新疆匪徒滋事庫車失守各路大兵雲集需餉甚殷著

沈桂芬卽將應解新疆銀四十萬兩迅速解往蘭州省城毋稍延玩此項餉銀四十萬兩其已經解到甘省者著都興阿恩麟迅解新疆不准截留動用並著都興阿恩麟在於甘肅欠解新疆餉項銀兩內趕緊措撥銀五萬兩派員趲程解往喀喇沙爾以備供支兵餉之用並將續到之項隨時撥解俾資接濟將此由六百里諭知都興阿沈桂芬並傳諭恩麟知之○伊犁將軍常清奏已革尙書陳孚恩已革總督樂斌在印房並文案處效力當差尙屬奮勉得旨陳孚恩荒誕謬妄因迎合載垣等獲譴樂斌前在陝甘任內聲名狼藉昏庸乖謬貽誤地方禍延今日該二員獲罪甚重均毋庸給予獎勵○己卯諭議政王軍機大臣等張之萬奏豫軍追賊入楚調回一軍扼守光固並裁勇練兵各一摺髮逆竄擾光山等處經副將徐連陞等督率兵勇分投剿洗該匪避兵遠颺悉向黃

安黃岡一帶竄去張之萬見派徐連陞色爾固善張曜等軍盡赴東路聽候僧格林沁調遣卽著僧格林沁嚴飭各軍出境追躡會合楚師兩面夾擊務將此股巨匪悉數殄除毋畱餘孽黃州水陸布置前據官文奏已派梁洪勝等營及丁長春等礮船前往扼守此時該郡徧地賊蹤官文務當嚴飭各營實力迎剿痛埽狂氛毋令蔓延爲患豫軍追賊入楚豫南門戶空虛張之萬見擬於赴楚各隊內抽調一軍駐紮光固防賊回竄所籌尙是卽著該撫面商僧格林沁斟酌妥辦僞啟逆等股竄向靡定荆子關一路防守甚關緊要張之萬見駐南陽當督飭張士元等營力守要隘毋稍疏懈所陳練兵代勇裁勇養兵之法實爲目前要務而陸續訓練尤係整頓兵制之關鍵張之萬旣稱已調歸德一營訓練業有成效卽著將其餘各營次第挑選逐日練習其練成之兵或酌量調赴

前敵使之親列行陣作其膽氣庶養一兵得一兵之用不得徒託空言有名無實張之萬毛昶熙奏汝南官軍攻克時玉洗賊寨並張家大圩梁家灣寨擒斬徐錫田劉周城等逆首一摺著責成毛昶熙督飭各軍搜捕餘匪悉數正法務絕根株出力員弁兵勇准由該撫等存記彙案請獎正在寄諭間據劉蓉奏另股游匪冒稱扶逆前由鄖西鎮安竄及鳳凰薈地方經官軍擊敗仍回竄鄖西等語此股賊匪游弋無常難保不由鄖西一帶窺伺漸川著張之萬督飭在防將士妥籌扼堵毋令賊蹤東竄將此由六百里各諭令知之○諭穆圖善劉蓉奏官軍進逼賊壘督勦疊勝見籌分兵扼堵情形並請將金順簡放副都統實缺各摺片蔡逆率其悍黨踞盤屋所屬之店子頭田峪口一帶與偽啟逆及鄭馬諸逆漸趨而西經穆圖善等飛咨曹克忠各軍分路環擊曹克忠復率所部

由郿縣槐芽鎮追擊敗賊於西駱谷新口峪等處雖疊次獲勝而該逆糾集悍黨蔓延三四十里非兩路夾攻不能收聚殲之效見在蔡逆移踞樓觀臺一帶穆圖善等已移營進逼並令曹克忠由東路緊逼前進卽着聯絡聲勢兩路夾擊以期一鼓殲除毋令此孽彼竄又成不了之局啟逆僞將葉有光等率部投誠賊勢並未大衰難保非別有詭謀計圖一逞著飭令黃鼎等分別眞僞斟酌辦理不可墮其術中扶啟各逆前竄鎮安劉蓉奏稱係據探報入告實未探明何股等語軍營偵探爲第一要務劉蓉所得一聞竄警不加詳察率行入告著再詳細查明據實具奏李雲麟前奏蔡逆已入穀中似此股賊匪已屬無能爲役何以此次竄出又稱其狡悍善戰非藍曹諸逆之比李雲麟復以無糧之故折回興安致該逆由大峪口任意出竄種種取巧貽誤殊出情理之外見在蔡

逆與啟鄭各逆業已麤聚一處著穆圖善劉蓉督飭所部各營會同李雲麟合力兜擒盡殲醜類儻堵剿不力致令出竄必惟穆圖善劉蓉李雲麟是問記名副都統金順既據該將軍等稱其馭軍嚴明不避艱險著交軍機處存記遇有副都統缺出卽請簡放劉蓉另片奏湖北前解多隆阿軍火器械餘贖尙多請飭移送陝省軍需局等語見在多隆阿舊部各軍多已回鄂其存留糧臺及荆子關轉運局軍火等項著穆圖善酌量情形轉飭多隆阿軍營糧臺各員將見存軍火器械查明數目移送陝省軍需局以便提撥應用將此由六百里各諭令知之○予陝西陣亡總管米方多爾濟遊擊何萬春祭葬世職○壬午候補四品京堂辦理陝南軍務李雲麟奏遵覆前次竄入尹家衛賊匪卽係蔡啟兩逆並無另股報聞○甲申諭議政王軍機大臣等官文奏官軍會剿逆匪疊獲

勝仗並派兵馳援麻城一摺髮捻各逆趨集黃麻一帶經成大吉
石清吉等軍分路勦擊屢有斬馘惟陳得才大股尙踞麻城白杲
沙河等處麻城之圍未解亟宜併力掃蕩著官文飭令成大吉石
清吉等營迅將白杲等處之賊痛加勦洗毋任蔓延麻城賊氛四
逼城中無糧甚形危急周鳳山楊朝林等援軍並著催令迅解城
圍不得稍有疏失前據張之萬奏豫省光山等處之賊已竄黃安
黃岡一帶是豫邊情形稍鬆僧格林沁見紫光山蘇克金等馬隊
已在光麻之交若橫出與楚軍會勦自更得手著僧格林沁卽飭
蘇克金等聯絡夾擊並遵前旨飭張曜色爾固善等軍出境追剿
與鄂軍四面兜圍務期盡殲醜類痛殄狂氛第賊勢注意東趨漸
水之雲路口已有梁洪勝五營繞前扼截該逆不能逞志恐其由
麻城直趨皖境僧格林沁官文尤當分飭各軍一面迎頭攔截毋

得徒事尾追至賊蹤蔓及皖境其姜玉順蕭河清藍斯明等軍已先後馳抵樊城鄂省兵力不爲不厚見在分別遣留自己就緒卽著催令徑赴黃州麻城一帶會同成大吉等併力進取以期厚集毋稍宕延官文俟遣撤勇丁整頓營務辦有眉目卽遵前旨移紮黃州以資調度將此由六百里各諭令知之○諭楊岳斌奏籌度緩急先赴要地督剿一摺據稱刻下賊勢併注江西撫建一帶見擬徑赴南昌布置再行馳赴東路擇賊勢最厚之處躬率諸將竭力攻剿俟到江後覈計兵力通盤籌畫再當兼顧皖南等語所籌甚是見在皖南無警自當先其所急力爭上游著該督卽行前赴江西省城會同沈葆楨妥商先將省城防務布置周密隨時偵探賊蹤察度情形於賊勢最重之區督率諸軍奮力剿洗一經得手自不難迎刃而解並仍須兼顧皖南毋任湖州廣德之賊續行上

竄該督撫務當和衷商辦迅殄賊氛以副委任將此由六百里各諭令知之○乙酉諭議政王軍機大臣等惲世臨奏湖南東西兩路邊界分籌防剿情形一摺據稱晃州邊境空虛分飭彭炳武等旋師赴衡周洪印旋師赴晃前會剿三崗之時有生苗聚眾扼紮後路幾梗而包毛仙股匪愈聚愈多由永綏以至晃州烽火相望雖經滕加洪等迎擊斃賊多名而逆眾未受大創且與伍逆倏分倏合另有清江苗匪在中寨橫塘滋擾該撫已密飭周洪印等分道出境確探逆蹤所在合力直搗堅巢著卽責令該總兵等確實偵探包逆大股是否悉踞麥地長坪務須出奇設伏就地殲除儻能將包逆擒斬餘賊自不難望風瓦解該撫卽督飭周洪印等認真辦理以清積年巨憝晃州去獨山荔波較遠旣未能前往會剿著卽飛咨勞崇光等實力勦辦俟包逆伍逆就殲再行酌量援剿

江西賊勢趨重撫建一路楊岳斌已由安慶赴省與沈葆楨會籌先就賊蹤最多之處奮力擊勦誠恐被擊分竄則湖南界連江西各屬更形喫緊著卽飭令派出各軍固守封圻然後率師出境以勦爲防更資得力將此由五百里諭令知之○諭常清奏漢回焚燒庫車城池並探聞文武被害各摺片與平瑞依奇哩業布沖額所奏情形大略相同昨諭常清趕緊籌撥進兵前往會勦茲據奏稱庫車城陷後阿克蘇係屬毗境所居回民倍於他處防務關緊緊要見派員帶兵五百名馳赴阿城相機進勦等語著卽嚴飭派出官兵迅速起程會籌勦洗惟庫城兵力單弱待援孔亟非添撥大枝勁旅不足以靖蕩著常清懍遵前旨迅撥精兵前赴庫城會勦依奇哩前調土爾扈特和碩特兵二千名聞該兩游牧蒙古兵素稱驍勇爲回匪所畏憚若能駕馭得宜俾該蒙兵樂爲我用

則攻勦頗能得力著依奇哩催令趕緊來城設法聯絡藉資協助
依奇哩前調葉爾羌伊犁兵三千名烏魯木齊兵二千名已據平
瑞奏報撥兵八百名業布冲額奏報撥兵二千一百名前往庫城
救援著平瑞文祥檄令各該官兵星速成行趨程前往文永先行
帶領援兵迅赴庫車文祥接奉前旨亦即迅速前赴庫車一帶乘
賊匪布置未定實力殲除以免延蔓阿克蘇係屬衝衢素稱饒裕
逆回垂涎已久防守極爲喫緊著崇恩兼程前進速赴新任儻再
一味畏葸遷延不進致誤戎機必將崇恩從重治罪富珠哩署理
阿克蘇辦事大臣責無旁貸卽著就見有兵力妥爲布置不可稍
有疏失文藝薩靈阿及庫城文武均被戕害衙門倉庫及各鋪面
全行焚燒所探是否確實著常清依奇哩等詳查具奏逆匪公舉
沙雅爾二阿渾名斜河爲頭目該頭目是否卽咸豐年間謀叛之

斜黑阿渾著常清併查具奏逆回既舉二阿渾爲頭目恐卽占踞
阿城以爲巢穴常清以回民不少暫令回人幫同守城回眾心志
最齊若令協同守禦務須以分良莠不分漢回之說妥爲駕馭勿
墮該逆詭謀著常清等嚴密籌辦毋稍疏虞冰嶺並伊犁北路一
帶常清尤當加意防堵並著景廉奎棟奎英懷遵本月初九日諭
旨一體嚴加防範認真辦理庫車兵餉缺乏著常清平瑞竭力設
措隨時接濟妥籌兼顧將此由六百里各諭令知之○丙戌諭議
政王軍機大臣等慶昫等奏提解糧餉到城並偵探近日賊情一
摺甯夏滿城自山西由草地解到協餉三萬兩阿拉善旗承運小
麥一千餘石沈桂芬續籌銀一萬兩並所撥鉛丸火藥亦將到城
該處得此接濟人心諒益固結附城之賊類多零星小醜不難掃
除著慶昫等一面激勵將士慎固城防一面分兵出擊剪除羽翼

斷不可以賊勢稍鬆漸涉疏懈逆首赫文典馬萬選皆左近平羅
豪富見遣其黨與回鄉割麥難保非糾眾前往阻截援兵都興阿
仍遵前旨探明道路派兵進剿慶昫奏稱由磴口過河自石觜山
節節前進即可直達平羅等語如由此路進兵較之繞越行走勢
更徑捷著都興阿斟酌辦理馬化澂一股在靈州張貼偽示歸罪
赫文典等自明無罪籠絡鄉民恐其搖惑民心仍圖西竄且與西
甯一帶回戶聲氣相通若不及早殲除將來肆意勾結其患未已
著都興阿雷正綰會商進剿訥欽所部兵勇未經戰陣著都興阿
隨時察看訥欽如不勝統率之任卽另行派員統帶此軍見存兵
勇旣不得力亦豈可坐耗餉糈著逐加挑選認真訓練其不堪驅
策者卽酌量遣撤以節糜費前因都興阿兵力較單諭令劉蓉俟
陝事稍鬆卽飭曹克忠一軍迅赴都興阿軍營以厚兵力如見在

曹克忠不能赴甘卽酌派數營前往助剿歸綏防務緊要且有甘省回匪東竄之謠桂成所帶之兵已諭令仍畱歸化城辦理防守暫緩赴甘矣沈桂芬籌畫甘省餉項甚爲得力見在甯夏需餉仍著陸續籌解源源接濟將此由六百里各諭令知之○丁亥 上詣 大高殿祈雨○諭議政王軍機大臣等沈葆楨奏江席兩軍會剿崇仁踞逆疊勝上清宮賊匪紛竄官軍迎剿失利遵查圍攻南豐情形請將席寶田暫革並自請治罪各摺片逆眾麤集江西占踞崇仁等城意圖久踞經江忠朝席寶田兩軍會剿崇仁疊獲勝仗殺賊一千三四百名勦辦尙屬出力惟賊勢尙眾而官軍又傷亡不少自應乘勝進剿穩慎圖功楊岳斌前奏先赴南昌會籌防剿此時計已行抵江西省城卽著會同沈葆楨督飭江忠朝席寶田各軍實力攻擊迅復崇仁並將宜黃南豐等處之賊以次殄

賊母稍鬆懈見在劉典進紮樂安之弓背墟王文瑞進紮樂安之太平墟皆偏近崇仁鮑超亦擬繞赴瑞臨進規崇仁以取迎勦之勢並著檄令各該軍會合江忠朝等所部併力進勦盡殲賊氛至上清宮之賊紛竄金谿之許灣一帶道員王沐帶兵進攻中伏失利因屬咎無可辭惟念其平日打仗尙稱勇往此次蹉跌實因眾寡不敵所致應得處分著加恩准予寬免以觀後效此時許灣之賊雖經劉于潯等擊敗而僞王宗李逆餘黨及林正揚等股復由廣昌甯化等處下竄與南豐賊合侍逆分黨東竄撫州經總兵胡占魁等擊退仍踞河西金谿之賊復分踞東鄉各村是東路賊氛正熾楊岳斌沈葆楨當督飭王德榜王開琳及周寬世進賢一軍視賊匪最多之處猛力進攻次第掃蕩毋任蔓延席寶田圍攻南豐日久未下本有應得之咎惟該員因建昌有警移軍回顧致兵

分見單未能得手尙非攻勦不力者可比沈葆楨請將席寶田暫行革職之處著加恩寬免並著該撫傳知席寶田感激愧奮以贖前愆沈葆楨自請從重治罪之處著一併寬免將此由六百里各諭令知之○廣江蘇鎮江府學額四名海門廳二名丹徒縣十名○予江西陣亡副將徐士貴等祭葬世職○戊子飭四川等省迅解甘餉○己丑諭議政王軍機大臣等會國藩奏遵覆疊奉諭旨一摺據稱李鴻章絕無避嫌之意所稱助攻金陵卽難協勦湖州係屬實在情形轉瞬新秋暑退該撫必可督兵前來至中外匪徒接濟賊糧金陵水陸一百六七十里不敢信其必無疏漏近聞戈登語及白齊文暗回中國招集無賴雇備輪船將赴金陵濟助意外之虞頗難防禦東趨髮捻已由麻黃等縣竄入英山境內調王可陞等移防無爲桐廬等處周寬世一軍已抵南昌令赴進賢防

勦新調各軍尙未到防安慶人心震動見催集防兵設法堵遏俟
皖北稍安李鴻章會勦有期卽當馳赴金陵商辦各等語李鴻章
前奏長興克復湖州賊股仍眾浙軍僅能扼東南兩面其西北濱
臨蘇常恐賊匪乘間內竄該撫擬由太湖馳赴長興察看軍情當
經諭令該撫於到長興後卽督軍助攻湖州俟湖州克復蘇常無
警再行親赴金陵著李鴻章仍遵前旨會合浙軍共克湖州轉瞬
蘇浙肅清礮隊練齊自當親督各軍前赴金陵翦除首惡辦賊之
要首在斷其接濟曾國藩務須督飭曾國荃嚴飭水陸諸軍晝夜
密防儻有暗中偷濟賊糧之事開礮痛擊毋稍懈怠白齊文前由
蘇城投出逐歸本國此次何以又暗同中國招集無賴雇備輪船
接濟金陵實屬怙惡不悛除由總理各國事務衙門王大臣知照
駐京各國使臣外並著李鴻章查明是否實有其事設法拏辦白

齊文屢敗之將無能爲役金陵守將惟當遇賊卽擊無恤其他官
文等前奏賊在黃麻一帶復糾眾回竄盤踞柳林舊街等處未言
東竄英山本日據曾國藩奏賊由麻城黃岡羅田等縣近已竄入
英山境內見令王可陞一軍移防無爲州咨李鴻章於新克長興
各軍中分兵守建平騰出李榕六營馳赴桐城並調李世忠舊部
陳自明四營由池州馳紮廬江均屬妥協著卽催令各軍趕緊到
防無任賊氛蔓延爲患周寬世已到南昌卽檄令赴進賢防剿毋
庸遽回皖北僧格林沁前奏駐紮光山一帶如賊蹤有東竄之信
諒已督軍追剿卽著督令蘇克金等認真躡剿喬松年身任皖撫
責無旁貸前調陳國瑞等軍均已到防卽著飭令迎頭截剿儻任
其深入蹂躪定惟該撫是問英霍去安慶不遠此時楚賊下犯恐
掣金陵全局果能扼守皖疆自與金陵大有裨益曾國藩本擬六

月親赴下游籌商攻剿刻下安慶人心未定自未能即時前往著將上游軍事布置周妥俟賊氛漸熄皖屬無憂再行約會李鴻章同赴金陵以期膚功迅奏前諭官文等分飭各軍一面迎頭攔截毋得徒事尾追使逆蹤蔓及皖境此股賊匪究由何路入皖黃麻一帶情形若何官文會否前赴黃州著卽據實馳奏以慰墜繫將此由六百里各諭令知之○廣江西鄉試中額二名秦和縣學額七名奉新臨川各四名南昌三名進賢靖安新昌清江金谿樂安新城貴溪餘干安義德安贛各一名湖北羅田九名○庚寅彭玉麟楊岳斌曾國荃奏臣國荃合圍金陵於五月三十日攻克太平門外僞地堡城六月初一日起令各營逼近城根輪流猛攻總兵陳萬勝王紹義郭鵬程等死之弁勇傷亡極多提督蕭孚泗候補道黃潤昌及各營官弁益切憤怒遂於龍膊子山麓修築礮臺日

夜轟擊一面多用溼蘆土囊填龍脖子高與成齊一面令總兵李臣典吳宗國何玉貴楊喜貴從山麓距城十數仗開挖地道剋日限抵城根而蕭孚泗張詩日蕭慶衍羅逢元臬司劉連捷道員彭毓橘連日攻之益力不收隊者半月礮斃賊首僞王甚多十四日朱南桂朱惟堂轟神策門地道盡破其月城而大城屹立仍未能克士卒死傷尤眾十五日李臣典地道告成十六日午刻發火衝開二十餘丈當經朱洪章劉連捷伍維壽張詩日熊登武陳壽武蕭孚泗彭毓橘蕭慶衍率各營大隊從倒口搶入城內悍賊數千死護倒口排列逆眾數萬捨命抗拒經朱洪章劉連捷伍維壽從中路大呼衝殺奮不顧身鏖戰三時之久賊乃大潰劉連捷張詩日由右路循城包鈔搶紮各門適朱南桂梁美材從神策門月城梯攻而入會合據定城北一帶彭毓橘蕭孚泗蕭慶衍武明良由

左路循城包鈔立奪朝陽洪武通濟等門適羅逢元趙三元易良虎陳湜彭椿年從南門旁舊倒口處梯攻而入會合據定城南一帶中關關江磯石壘一經提督黃翼升總兵許雲發率水師各營攻入臣國荃至太平門倒口進登龍廣山督陣見攻克省城之大勢已定遂趕回老營將大略情形一面具報一面飭官軍環城內外紮定兼扼各路要隘計自十六日午時起至日暮殲斃悍賊數萬攻毀偽府數十處惟首逆洪酋等所居築有偽城甚大死黨不下萬人經官軍四面環攻尙未破入大約一二日內卽能剿洗淨盡其老幼婦女甚多臣國荃傳令各營一概釋放以普皇仁其詳細戰狀各逆酋下落及應獎應卹人員查明咨請督臣曾國藩具奏上諭內閣楊岳斌彭玉麟曾國荃由八百里馳奏官軍克復金陵外城殲斃悍賊數萬攻毀各偽府數十處惟逆首偽城未

破死黨萬餘跽伏不出官軍四面圍攻金底游魂諒難久稽顯戮
仍著會國荃等嚴飭各軍力拔僞城殲擒巨逆以申天討而快人
心此次立功諸臣侯會國藩將詳細戰狀奏到時卽行渥沛恩施
同膺懋賞○諭議政王軍機大臣等楊岳斌彭玉麟會國荃由八
百里馳奏官軍克復金陵大概情形一摺逆首洪秀全等以數十
萬逆眾久踞金陵負嵎死守會國荃等督兵圍攻所部不滿五萬
兩載以來將城外賊壘悉數掃蕩茲復於炎風烈日之中傷亡枕
藉之餘併力猛攻克拔堅城非會國藩調度有方會國荃及各將
士踴躍用命不能建此奇勳披覽之餘曷勝欣慰此次立功諸臣
俟將僞城攻破
渥沛恩施同膺懋賞見在悍眾萬
餘力守僞城困獸猶鬪難保不拌死竄突會國藩彭玉麟會國荃
務當飭水陸官軍乘勝進攻尤當於勇往之中加以慎重不可稍

涉大意其洪秀全及著名巨酋必須悉數擒獲毋使乘間免脫致
稽顯戮此外被脅難民仍著妥爲撫卹設法安插以示寬大之仁
此次應獎應卹人員會國藩查明具奏日來深盼續到捷報如金
陵餘賊掃除淨盡卽著會國荃先行馳奏金陵城大兵單敗殘餘
匪難保不四出奔竄高溧丹句一帶與金陵處處毗連李鴻章當
嚴飭在防各軍實力扼剿遇賊卽擊馮子材魁玉飭令陶茂森等
軍聯絡聲勢一體截剿總期盡絕根株毋使一名漏網富明阿督
飭揚防諸軍嚴扼沿江各口勿令乘間偷渡金陵巢穴已覆其餘
各路逆匪自必聞風喪膽著左宗棠李鴻章乘此聲勢一鼓作氣
迅將湖郡攻拔並著左宗棠派兵嚴扼皖南遏賊上竄之路江西
援兵雲集楊岳斌計已行抵南昌卽著督率水陸各營迅將江右
逆氛掃蕩並杜皖南竄賊俾東南數省咸就肅清登吾民於衽席

有厚望焉將此由六百里加緊各諭令知之○諭喬松年奏陳國瑞一軍已抵正陽該撫擬移紮壽州扼剿並布置英翰等軍擇要駐紮暨潁州所屬民間良圩未可平毀各摺片楚境斬羅賊匪逐漸東趨是皖境邊防愈形喫重陳國瑞已抵正陽駐紮防剿扼賊下竄之路卽著喬松年飭該總兵嚴密堵禦擇要布置並稟商僧格林沁相機調度壽州爲六安潁上扼要之區該撫卽擬移紮壽州以居形勝所籌甚合機宜惟賊勢東竄奔突靡定據稱僧格林沁見已派員於三河尖一帶查看駐營地勢如賊竄皖境卽親督追剿該撫見已調英翰等軍駐紮潁上懷遠等處卽著飭令各軍勤加偵探嚴密防守萬一賊蹤東趨務當督飭各路官兵會同僧格林沁之師前後夾擊掃蕩逆氛毋令擾及完善至潁州所屬太和等縣民間築圩固守自係堅壁清野成法所有舊日良善各圩

卽著毋庸平毀該撫務須曉諭各圩民使一聞寇警仍各完聚入
保俾賊無所擄掠官兵自易於勦辦仍隨時偵察有無匪類潛蹤
俟軍務稍鬆再令一律平毀將此由五百里諭令知之○諭李雲
麟奏率師援陝事皆棘手並餉源已絕所部軍士畱撤皆難各一
摺行軍之道首重糧餉李雲麟所部一軍約六千人每月需餉三
萬餘兩前經諭令陝西湖北兩省分任其半山東河南月解協餉
銀一萬兩以資接濟何以山東則置若罔聞河南則僅解千兩劉
蓉與李雲麟同辦陝賊何亦視同吳越並不代爲籌畫李雲麟見
將各軍暫駐興安該處米麥雜糧諸形昂貴而餉無來源更難購
買萬一飢軍潰散陝南門戶空虛於大局殊有關繫著閻敬銘張
之萬將應解月餉趕緊籌措源源協濟劉蓉恪遵前旨將該營應
需糧餉軍火妥籌接濟不得膜視並著官文唐訓方將李雲麟所

部楚軍五六兩月餉需懷遵前旨設法迅速籌解毋稍遲誤刑賞
爲用兵急務若有功人員過時不賞何以責其用命所有山陽出
力及扼堵髮匪川匪之水陸各營著官文劉蓉迅速查明籲請施
恩不得稍分畛域李雲麟受不次超擢殊恩應如何感激奮興力
圖報稱乃因辦賊無效輒以餉竭糧匱爲詞藉思諉卸況滇髮各
逆見竄郿縣一帶將由棧道出漢中是陝南防務正當喫緊該京
堂乃稱陝南暫就肅清請將兵勇遣撤或調赴他處於扼勦緊要
之時作退避息肩之計不知李雲麟是何居心著仍督飭各軍力
籌防勦儻敢縱賊出險致漢中興安各屬復遭蹂躪必惟該京堂
是問將此由六百里諭知官文閻敬銘張之萬劉蓉李雲麟並傳
諭唐訓方知之○諭都興阿奏查看地勢賊情繪圖呈覽並陳連
日籌辦情形一摺該將軍以定邊距靈較遠且與前營隔膜督兵

進紫花馬池以便聯絡聲威相機進剿並查明該逆自靈州金積堡等處接連占踞城堡蔓延將及千里非分兵三路進剿難期得力所辦甚爲周妥惟據該將軍奏稱查探赴援甯夏之路一望沙漠繞路甚遠水草處處不便接見鄂爾多斯副盟長準噶爾扎薩克貝子扎那濟爾第面稱前去磴口渡河不過八站與慶昫前奏情節相符該將軍若由此路進兵勢甚便捷著卽探明水草遠近催調各路官兵直擣甯靈毋稍延緩雷正綰進兵固原能否與該將軍合力進攻著都興阿等斟酌緩急妥籌辦理前因都興阿軍營兵力較單諭令劉蓉侯陝事稍鬆曹克忠一軍赴甘或酌派數營前往助剿並前據文煜奏稱前任總督熙麟飭令參將王泰來招募楚勇三千三百餘名歸都興阿調遣此項官兵曾否到營著都興阿分別催提到營以厚兵力訥欽趙延烜兩軍未經戰陣卽

著將老弱兵勇認真裁撤酌留精銳並著勤加操練俾歸實用將此由六百里各諭令知之○諭依奇哩奏布古爾庫爾勒二汛被匪焚燒並催調烏魯木齊等處官兵會剿各摺片庫車變起倉卒匪蹤漸次東竄擾及布古爾臺其庫爾勒汛亦有漢回變亂放火焚燒復敢直撲喀喇沙爾城池經依奇哩派兵擊散復令土爾扈特和碩特等處官兵分別剿殺多名餘匪逃竄布庫二汛失守依奇哩失於防範著交部議處前因庫車賊匪竄至布古爾地方諭令依奇哩催調土爾扈特和碩特兩游牧蒙古兵二千名來城助剿該蒙古兵素爲同人所畏憚到城以後必能奮勇殺賊著卽激勵籠絡俾克踴躍前驅樂爲我用烏魯木齊吐魯番均距該城不遠雖經平瑞派兵四百名榮慶派兵二百名前來防堵尙覺兵力較單不敷剿辦著依奇哩咨催該二城添派兵弁會剿一面飭令

見派各軍將東竄之匪悉數殲除俾前派各軍專意西指迅復庫城免致賊氛日久延蔓愈難收拾文永文祥諒已前後馳抵庫城平瑞等所派之兵務須飭令鼓勇前進迅速進行均著懍遵前旨乘賊匪布置未定奮力進剿毋得遷延干咎常清統轄各城責任甚重前諭撥兵會剿著迅速調派不准稽遲見在庫車所屬軍臺處處失守上城文報改由小嶺遞送該處見在情形尤爲喫重常清著懍遵前旨加意防堵附近各城並著隨時咨照駐守之參贊辦事大臣等嚴加防範認真辦理毋稍疏失將此由六百里各諭令知之○廣廣東四會縣學額二名○辛卯雨 上詣 大高殿報謝○壬辰諭議政王軍機大臣等富明阿奏江甯省城已克擬派協領恆玉等先赴金陵查看滿城情形再籌布置俟軍事稍定卽親赴省垣等語金陵外城業經克復洪逆僅率賊眾萬餘抗守

僞城諒不難剋期攻拔惟該逆計窮勢蹙深恐鋌險出竄江北各口亟應加意嚴防鄂省髮捻東趨前據曾國藩奏已由麻黃等境竄向英山一帶意圖由皖回援金陵僧格林沁已督兵進紮三河尖陳國瑞駐兵正陽關防堵天長六合等處亦當嚴密布置扼賊竄突著富明阿懷遵前旨督飭揚防水陸各軍嚴扼江北各要隘毋令零星賊股乘間闖入擾及完善地方並嚴飭天六等處防軍慎密防範遏髮捻東趨之路該將軍仍當扼紮揚州安籌分布毋庸卽赴金陵俟江甯全城克復巨逆授首江南北一律肅清該將軍如須親赴滿城籌辦善後屆時再行奏明請旨酌量辦理將此由五百里諭令知之○左宗棠奏五月初一日湖州踞逆由東南分撲長生橋官軍營壘通判蔡元吉豫調洋槍隊二百餘名分伏桑林待賊撲近突起轟之斃賊數百臣以賊勢既趨重此路蔡元

吉兵力尙單飭蔣益澧分撥師船並調都司湯葆元飛划一營前往助剿十四日該逆大股麇至蔡元吉督隊奮擊相持至暮該逆卽偪長生橋亭子橋兩營時總兵劉樹元等率水師各營移紮菱湖以壯聲援蔣益澧以蔡元吉一軍連日鏖戰賊鋒未挫抽撥三營馳往助剿二十日該逆復出悍黨數千分撲蔡元吉營壘環攻五時均經擊退該逆復乘虛繞襲菱湖鈔我後路劉連陞率副將蔣榮彩等各營師船竭力堵截高連陞派隊助之賊見援軍突至駭而奔二十九日袁家匯賊目李得芳赴蔡元吉營中請降蔡元吉許之三十日親赴袁家匯攻取未降各壘僞輔王楊輔青卽率悍黨來爭蔡元吉麾眾分路截殺羣賊潰竄遂將袁家匯賊壘一律焚毀率降眾七百餘回營蔣益澧當飭將新附之眾編立一營其南路賊匪於五月初九日由太湖塘楊漢分撲章字右後兩營

劉樹元飭何培英各營馳往截擊自率所部繞軌村兜剿該逆分向太湖塘楊淩竄去二十四日何培英督隊乘勝猛擊劉樹元亦馳往接應立破賊壘三座餘賊皆棄壘狂竄官軍追殺數里將太湖塘楊淩等處賊壘一律掃蕩二十七日分擊晟舍賊壘破賊卡一座而還其西路長興至安吉百餘里皆爲賊踞五月十七日安吉賊千餘竄至高塢嶺經羅大椿等截擊斃賊數百名生擒百餘名旋准李鴻章來咨已派水陸四十營進攻長興臣飭楊昌濬率各營進規湖州西路期與蘇軍漸合長圍飭蔣益澧派總兵周廷瑞等六營由餘抗拔赴黃湖會剿二十四日蘇軍攻克長興縣城敗賊悉退四安楊昌濬率各營由牌頭進銅嶺扼之令知府劉璈副將劉端冕谷香山等三營會同周廷瑞六營由黃湖直搗孝豐縣城六月初三夜開潛師臨嶺以進谷香山劉端冕躍過重濠揮

軍直入劉璈督隊繼之奮攻踰時賊勢不支周廷瑞督各營由東門攻入城賊大亂奪路逃竄當於初四日將孝豐縣城克復周廷瑞劉璈揮軍追擊外委李必得矛刺逆首落馬生擒以歸訊之卽僞戴王陳榮也是役斃賊千餘名生擒長髮廣賊數百名拔出難民婦女五六百名惟安吉廣德州尙爲賊踞甯國縣並無官軍湖州踞賊如圖西竄勢必假道於此已畱劉璈劉端冕谷香山三營駐守其地扼之並令楊昌濬迅攻安吉據報梅溪四安踞賊尙有數萬與廣德安吉之賊互相聯絡官軍進攻安吉必來救援恐有腹背受敵之患臣已函商江蘇撫臣檄長興之軍分攻四安以掣其勢並飭知楊昌濬如安吉一時不能驟下或先攻梅溪庶湖州之賊與安吉劃而爲兩較易收功此次進攻湖州尤爲出力之知府劉璈等懇請先行獎勵其餘出力員弁可否由臣存記俟克復

湖州彙案保獎出自 天恩又奏竄閩之賊僅林政揚花旗一起見已回竄江西意圖合併巨股揆度賊情非經江西痛剿窮蹙無歸必不違竄閩境惟延建邵汀一帶盜匪素多亟應速予誅鋤以靖內患見在康國器之軍已抵邵郡臬司張運蘭已據稟報率所部由江西信豐等處以入汀州臣已飭其確偵江西賊蹤相機進剿 上諭孝豐既克則湖州安吉賊勢漸孤左宗棠已令楊昌濬進攻安吉恐梅溪四安等處之賊齊心救援將有腹背受敵之患著李鴻章檄飭長興得勝之軍分攻四安以牽賊勢必須湖州之賊與安吉劃而爲二方可收功湖州東路水陸各營已屢獲勝仗埽蕩賊壘不少左宗棠卽督飭蔣益澧等各營水陸夾攻務須一鼓作氣迅克堅城此時金陵外城克復洪逆已如釜魚阱獸恐各處賊匪均無同志勢必紛紛圖竄且太湖廣袤數百里江浙路路

可通尤須嚴密防維以免疏漏其廣德之賊恐與徽浙各逆互相聯絡是皖南一股根株殊難淨絕會國藩左宗棠均須隨時兼顧免致臨時棘手蘇常各屬地方李鴻章飭各路守將認真防範毋稍大意左宗棠另片奏林正揚花旗一股已由閩回竄江西惟延建邵汀一帶盜匪素多亟應速予誅鋤以清內患見在康國器之軍已抵邵郡張運蘭已由江西入汀州該督卽飭令該員等各將邊境腹地匪徒迅速剿洗無任續有竄入閩省將吏如有不能得力者仍遵前旨嚴爲甄汰均須隨時與徐宗幹咨商會辦毋稍瞻顧將此由六百里各諭令知之○諭張之萬奏西路邊防稍鬆擬移營進紮汝郡並籌解甯夏甘餉銀數各摺片陝省逆匪分竄郿縣一帶豫西之防已鬆而汝南新息烽煙甫靖馬步各軍均行入楚會剿後路空虛僧格林沁見擬進紮三河尖張之萬擬卽移軍

汝郡以資聯絡所籌尙合機宜見在髮逆大股屯聚麻城黃安一帶曾國藩前奏逆蹤已擾及英山是皖北軍情已形喫重前諭僧格林沁官文督飭蘇克金張曜成大吉等軍分兵繞前截擊無使悉數東趨此時僧格林沁進駐三河尖正可督飭諸軍迎頭堵剿卽著僧格林沁官文檄令馬步各軍聯絡夾擊迅將黃麻英山一帶之賊就地殲除無任竄突其陳國瑞駐正陽之軍及皖北各路防兵並著僧格林沁喬松年豫籌布置如賊勢悉銳東竄卽令覘賊所向與鄂軍前截後追力顧皖北完善之區毋得稍有疏虞張之萬移紮汝甯該處地方久爲賊藪且麻城逆匪復有竄至商城新店等情賊蹤飄忽尤難豫料卽著該撫移營進紮以爲豫軍後路聲援並與僧格林沁妥籌策應一面將汝南一帶搜捕餘匪鎮撫地方各事宜督飭地方官妥爲辦理其駐防荆子關之張士元

一軍仍著飭令該遊擊嚴密扼守以固西路門戶昨據曾國荃等馳奏江南官軍克復金陵外城此時金陵巢穴已覆由鄂竄皖之賊自己聞風喪膽失所依據該大臣督撫等其各同心勦力迅奏膚功肅清皖鄂有厚望焉至該逆雖係聲言回救金陵難保不伺隙蹈瑕復行回竄鄂省上游及豫南一帶官文張之萬等尤當妥籌備豫慎固封守毋爲該逆所乘另摺奏摺獲過境陝省兵勇攜帶婦女請移案赴楚審辦等語此次由陝赴楚兵丁周德興等竟敢攜帶婦女同行實屬大干例禁其所供並非搶自民間已難憑信況據周德興等供稱上年追賊在蘇家溝地方救出張孫氏等經總兵邱世成令其分畱爲妻其劉程氏一名亦係參將朱殿魁由賊中救出收畱此等婦女均係遭難流離殊堪憫惻該總兵參將等以專閫大員輒敢乘人之危擅行收畱卽與搶自民間無異

似此劣弁若不從嚴重辦何以肅軍律而儆效尤著官文卽將此案於豫省咨送到後嚴行審訊案照軍法從重治罪毋稍寬縱總兵邱世成遊擊王占勝參將朱殿魁等無論在陝在楚均著官文嚴提審訊其兵丁周德興李長春熊有德三名卽著張之萬押解赴鄂歸案審辦以成信讞將此由六百里各諭令知之○諭常清奏官兵起程日期請添兵籌餉據報剿賊獲勝請飭催明緒赴任平瑞奏續撥二起官兵馳赴喀喇沙爾飭屬嚴防奎棟奏庫車變亂派兵堵剿富珠哩奏庫車官員被害阿克蘇回子聞風滋事各摺片覽奏均悉庫城回匪滋事後布古爾庫爾勒等汛相繼失陷逆餒甚張官軍勢甚單弱亟應添撥勁旅以遏狂氛著常清平瑞奎棟富珠哩業布冲額嚴檄派出官軍星速赴援兼程前進乘庫城逆匪立腳未定迅就殄除方爲妥善德明管帶蒙兵旣據常清

奏稱尙屬合宜所有土爾扈特兵二千名卽著飭令該總兵統帶相機進剿各城大臣未到任者尙有十二員之多著兵部嚴催各該員趕緊前進速赴新任毋再遷延觀望致干重咎常清請飭陝甘總督撥兵五千名助剿並派員專司糧餉見在甘省逆回鴟張本省兵力旣單而都興阿所部可用者又止馬隊八百餘名步勇千名剿辦甚屬不敷萬難分兵兼顧回疆所請撥兵五千助剿之處著毋庸議見在金陵已克東南大軍指日卽可凱撤更可騰出餉需協濟各該城以收士飽馬騰之效該將軍以軍務緊要請飭明緒速赴伊犁參贊之任卽著照所請行哈拉玉爾滾等處官軍剿賊獲勝著常清等嚴飭派出各官兵乘此聲威星速進攻以期迅殲醜類阿克蘇所屬之賽里木拜城無業回子聞風滋事亟應妥爲彈壓著富珠哩督飭派出之趙維傑等軍速赴賽里木拜城

先行設法撫輯再赴庫車實力進剿該城糧臺事務著常清飭令同知崇熙樽節辦理據平瑞奏稱文永已於五月二十日到城卽著該大臣統率滿漢官兵前往救援並著文祥帶隊趕緊星馳助剿業布冲額派援庫城之馬步兵一千五百名應需鹽糧等項平瑞設法籌解烏城南山一帶尙有僻路可通喀喇沙爾等處難保該匪不暗中往來藉圖勾結平瑞務當嚴密盤查認真防守毋任匪蹤闖入其餘該都統所籌布置機宜尙臻妥協卽著照所擬辦理伊犁官兵遣勇旣爲該匪所最畏卽著奎棟會商常清酌派大員統帶此項兵勇由冰嶺馳赴阿克蘇會同剿辦迅殄逆氛將此由六百里各諭令知之○以克復浙江孝豐縣城生擒僞戴王陳榮賞知府劉璈道銜副將劉端冕谷香山通判蔡元吉巴圖魯名號○癸巳諭議政王軍機大臣等李鴻章奏馳赴長興擬遵旨抽

調槍礮隊助攻金陵一摺昨據楊岳斌等馳奏官軍克復金陵外城洪逆堅踞大城以內之僞城官軍四面圍攻等語李鴻章以疊奉寄諭仍令助攻金陵擬抽派王永勝等營及劉銘傳等槍隊一萬四千人前往助攻自係尙未接悉金陵克復之信惟僞城既堅賊窮且悍難保不爲困獸之鬪仍著李鴻章探明如金陵全城均經克復即可無庸調往以爲協剿湖州之用儻尙未蕪功有必須添調槍礮各隊之處仍著李鴻章飭令派出各軍攜帶炸礮火器星馳前往協力猛攻以期膚功早奏左宗棠昨奏浙軍克復孝豐見令楊昌濬進圖安吉恐梅溪四安之賊齊心赴援腹背受敵當經諭令李鴻章飭長興得勝之軍分攻四安使湖州安吉之賊劃而爲二著該撫卽遵前旨令郭松林吳毓芬等水陸各營一面畱軍扼守長興一面分攻四安與浙軍縱橫夾擊以牽賊勢其太湖

東西兩岸潘鼎新劉秉璋等營並卽檄令會同李朝斌水師期會浙軍聯絡並進以期浙合長圍迅圖克復湖州肅清全浙仍嚴扼蘇常等屬以防竄突將此由六百里諭令知之○諭毛鴻賓郭嵩燾奏藩司辦事竭蹶不勝繁劇之任一摺據稱藩司吳昌壽以知縣在粵候補已二十年屬吏半係故交不能破除情面派候補道屠繼烈督催覈算交代該藩司一味遷就含糊搪塞釐務捐輸本供該藩司支放而該藩司茫無策畫於輕重緩急之序略不置意避就恩怨且窘於計畫兩次引病乞退經開導慰留原冀其力加振作詎料執持意見愈覺一籌莫展等語吳昌壽已簡放湖北巡撫若如毛鴻賓等所奏辦事顛預諸務難資整飭於藩司尙難稱職又安望其身任封圻實力整頓耶惟又據該督撫奏稱吳昌壽性情耿直操守廉潔頗爲時譽所推是其人品亦尙可取且吳昌

壽從未服官楚北該省屬員未必多係故交或可望其振刷精神
力圖整頓吳昌壽到鄂後是否堪以勝任之處著官文隨時察看
據實奏聞原摺著鈔給閱看將此密諭知之○甲午僧格林沁奏
查髮捻各逆前竄光山之新集等處經臣軍追剿復由新集向麻
城奔竄臣於五月二十五日移營光州迤北淮河北岸之長嶺集
以爲北面之防仍飭蘇克金張曜迅由西北進兵見在蘇克金等
軍業已進紮距麻城四十里之黃土岡疊接稟稱該逆環逼麻城
以閭家河爲巢穴我軍節次進剿均有斬擒惟麻城西北一路山
道崎嶇不能安營復准官文咨成大吉會商楊朝林周鳳山等已
於初七日帶隊移紮六合集被賊包鈔後路新鳳等營挫敗見在
髮捻勢將合圍斷我糧道又據英山縣知縣探報前竄英山之賊
於初四五等日回竄羅田麻城一帶各等語查麻城一帶多係山

路馬隊不能施展全賴步隊進擊方收實效臣前調張曜步隊作
爲前敵將及一月屢次具稟一味遷延搪塞並未實力進剿殊屬
不知緩急應請旨將總兵張曜暫行革職仍責令迅速進兵以觀
後效查髮捻各逆畏我馬隊衝擊不敢竄至平原在麻城一帶恃
險負固欲爲久踞之計非痛加剿洗不能挫其兇鋒臣因札飭陳
國瑞帶領所部由三河尖商城一路兼程馳赴麻城會合蘇克金
張曜等軍併力兜剿並令英翰酌帶所部兩營馳往商城駐紮以
爲該鎮後路聲援其餘該司所部勇隊亦歸陳國瑞帶赴麻城以
厚兵力如此添兵進擊當可迅殄寇氛但陳國瑞一軍移營前進
則正陽關未免空虛昨已函商撫臣喬松年帶領皖軍移紮正陽
以資策應臣仍紮長嶺集相機調度儻該逆被擊東竄一至平原
卽當督隊鈔擊痛殲醜黨上諭議政王軍機大臣等逆匪趨重

麻城一帶張曜奉調作爲前敵並不實力進剿實堪痛恨本應從重治罪此次姑照該大臣所請張曜卽著暫行革職仍畱營效力以觀後效著僧格林沁督飭該總兵實力進剿儻再不知愧奮卽行嚴參懲辦已革提督馬德昭久經行陣帶隊頗能得力因熙麟告病開缺由甘回陝本日已寄諭劉蓉飭令馬德昭前赴該大臣軍營到營後卽由該大臣酌量差委該逆環逼麻城以閻家河爲巢穴蘇克金等軍見已進紮距麻城北四十里之黃土岡正可乘此逆眾紛集之時爲一鼓聚殲之計該處山徑旣不利馬隊該大臣止須多調得力步隊合剿斷不可親自督軍前進致有疏失據該大臣奏檄調陳國瑞所部由三河尖商城一路兼程馳赴麻城會合蘇克金張曜等併力兜剿並飭令英翰酌帶兩營駐紮商城爲陳國瑞後路援應其餘該司所部勇隊均歸陳國瑞統帶赴麻

如此則兵力較厚自不難迅掃狂氛陳國瑞移營之後正陽關未免空虛著喬松年帶領皖兵進紮正陽扼守要衝兼爲壽州保障該撫前奏擬移紮壽州扼剿見在既須移營則壽州地方應派何員扼守並著妥爲調派並會商僧格林沁會國藩豫籌布置以免疏虞僧格林沁摺內所稱准官文咨稱提督成大吉進紮徐門古北岡會商楊朝林周鳳山於初六日移紮六合集被賊包鈔後路新鳳等營挫敗該提督撥隊策應將賊擊退見在髮捻勢將四面合圍斷我糧道等語此等軍情何以未據官文奏報著官文卽責令成大吉等將此股逆眾盡力剿洗新鳳等營挫敗必須嚴申紀律重整軍威方可轉敗爲勝著將挫敗情形據實奏聞不准一字諱飾刻下金陵外城已破而連日未據續報捷音恐內城各匪仍圖死拒楚北各逆一聞此信必將拌死東趨仍圖回救東路皖防

未可稍形鬆懈否則

岫自固或因首逆巢穴已覆仍

由舊路回竄均難著手該大臣等務須通力合作探賊所向就地殲除毋任日久蔓延是爲至要河北鎮總兵楊長春打仗尙稱得力著張之萬卽飭該總兵前赴僧格林沁軍營聽候調遣其河北鎮一缺卽由該撫派員署理另片奏請飭張之萬移紮汝郡以資鎮撫等語昨據張之萬奏移營進紮汝郡已諭令該撫迅速赴汝與僧格林沁聯絡聲勢該撫到汝後卽將防守安輯各事宜次第妥辦陝豫楚交界各隘口應須移兵設防豫防賊匪竄突之處並著張之萬悉心布置不得稍涉大意將此由六百里各諭令知之○諭依奇哩奏烏沙克他爾剿賊獲勝一摺據稱逃匪糾結烏臺回匪數百名滋擾烏沙克他爾汛地燒毀軍臺經依奇哩派令綠營蒙古官兵會同和碩特所派蒙古官兵進剿斃賊無數餘匪亂

行逃竄等語庫爾勒等處逆回勢正猖獗烏沙克他爾又有逆眾倡亂雖經官軍勦勝而山徑紛歧林木叢雜設被敗匪潛藏其中將來出沒無常於臺站大有關繫且此股逃匪是否卽庫爾勒等處之匪潛越該城迤邐而東該大臣所奏殊未明晰著依奇哩一面詳查一面飭令派出各兵嚴行搜捕以淨根株和碩特蒙兵旣稱得力著依奇哩妥爲籠絡俾該蒙兵益加奮勇當更得其臂助喀喇沙爾兵力較單城守最關緊要未能分兵進勦烏魯木齊所派援軍著平瑞催令星速前進迅掃逆氛依奇哩務當將防守城池安設軍臺疏通驛路各事宜妥爲籌備文永已抵烏城文祥當已陸續前進庫車賊氛旣熾喀喇沙爾各臺汛復賊眾蜂起文永等進援庫車必由喀喇沙爾經過著卽由該城轉戰而前將沿途之賊勦盡直擣庫城力圖克復毋稍延緩常清前後所派各軍著

探明道路趨程進發毋得遷延觀望致誤戎機將此由六百里各諭令知之○諭據文祥奏稱勘估塔爾納沁等處渠道工程經費浩繁該大臣首先倡捐官吏紳商等踴躍輸將見已興修過半計期八月杪可以一律完工派出之委員伯克捐生可否俟工竣後酌量保奏各等語此項渠道工程業已辦有頭緒所籌各節均甚周妥文祥前已簡放烏魯木齊提督帶兵前赴庫車等處會勦所有挑渠建插等項工程卽著保恆於到任後按照所撥章程飭令該委員等實力接辦務須一律寬深堅固以資灌溉其捐辦渠工之扎薩克郡王伯錫爾及委員伯克捐生人等並著俟渠工完竣酌量奏請獎勵將此諭令知之○兵部議覆御史朱澄瀾奏各省招募勇丁請如制兵之例專用土著良民並查明有無親丁註冊存案應如所請飭下各路統兵大臣遵照辦理至所請殉難勇丁

子弟挑補兵缺例無明文且未知該勇丁子弟願否入伍應令各督撫體察情形妥爲辦理從之○免已革黃巖鎮總兵官黃彬遣戍○乙未諭議政王軍機大臣等李鴻章奏金陵克復改派各軍分投堵剿一摺前據曾國荃等奏官軍克復金陵外城不過一二日即可剿清餘匪等語連日翹盼捷音未據續報殊深厯繫該逆死黨尚有萬餘曾國荃於攻克大城時卽應一鼓作氣將偽城儘力攻拔生擒首逆乃因大勢稍定遽回老營恐將士等貪取財物因而懈弛萬一該逆委棄輜重餌我軍士而潛出別道乘我不備冀圖一逞或伺間奔竄衝出重圍均不可不慮著曾國藩飭令曾國荃督率將士迅將偽城剋日攻拔殲擒首逆以竟一簣之功同膺懋賞儻曾國荃驟勝而驕令垂成之功或有中變致稽時日必惟曾國荃是問李鴻章於前日奏到派出王永勝劉銘傳等軍並

攜帶炸礮隊助攻金陵當經諭知金陵外城已破而僞城未拔仍令迅往助攻乃本日據奏接會國荃飛咨金陵已於十六日午刻克復是李鴻章於僞城未拔情形尙未知悉軍情變幻事機緊要著李鴻章仍遵前旨飭令派出各軍攜帶炸礮火器星馳前往金陵協力攻剿此外如有逸出之賊仍著會台分守要隘各軍分投截剿毋令一名漏網將此由六百里加緊各諭令知之○廣江西南康府學額四名建昌三名都昌廣昌各九名○丙申諭議政王軍機大臣等楊岳斌奏抵江日期附陳布置大概情形一摺侍逆李侍賢自力攻撫建不下橫踞崇仁宜黃與南豐沛逆聯爲一氣以窺撫建西路康聽兩逆蔓延金谿東鄉以窺撫建東路漸成長圍之勢見在江忠朝席寶田偪紮崇仁城下劉典王文瑞仍紮樂安以爲聲援是爲西路之兵周寬世駐紮進賢王德榜王開琳均

馳駐安仁之鄧家埠合剿東鄉是爲東路之兵撫建城內外復有王沐韓進春等軍足資固守布置均尙嚴密惟侍逆以賊中著名兇悍金谿東鄉南豐之賊耽耽環伺恐其以金陵巢穴已覆將圖踞有撫建以爲喘息之謀此時進兵要著自應先由崇宜下手擣其要害使該逆長圍旣破則東西兩路無難迎刃而解楊岳斌見檄鮑超一軍由瑞州改趨宜黃擊其腰脅使崇仁南豐首尾不能相顧全局可期震動所籌深合機宜鮑超所向克捷此次進攻宜黃必能得手卽著檄令該提督悉銳星馳實力猛攻期於必得並著楊岳斌沈葆楨飭令東西兩路官軍同時並舉迅赴事機以期一鼓殲除埽清腹地該督以陸路親兵單薄擬添募勁勇八千人以便督戰卽著與沈葆楨妥籌辦理此時江南軍事得手而江右羣盜充斥如有應須添兵募勇之處沈葆楨尤當力籌全局毋得

以餉糈支絀致兵力或有不敷貽誤疆事也將此由六百里各諭
今知之○丁酉諭議政王軍機大臣等惲世臨奏楚師進剿黔匪
獲勝並清江苗匪攻陷天柱防堵情形一摺貴州匪黨石秀坤與
號匪勾通竄擾毗連沅晃之牛場坡經周洪印等進攻毀其五壘
其清水哨踞賊分竄牛欄場等處復經滕加洪等疊次擊敗惟松
桃一帶與楚接壤賊氛蔓延數百里此次雖疊有斬擒並未大受
懲創著惲世臨卽飭周洪印增募勇丁千名與保慶黃元齡等軍
分路前進務期大彰撻伐以剿爲防毋得以零星斬馘一奏塞責
駱秉章前派駐秀各營並著飭令入黔與楚軍會同夾擊務將包
伍等逆悉數殲除以清積年巨憝仍一面嚴扼川邊毋令闖入以
保完善清江苗匪攻陷天柱縣城知縣方時乾聞已殉難何以勞
崇光張亮基並未馳奏見在楚邊黔晃靖會一帶處處須防惲世

臨自應先顧疆圉俟松桃勦辦事竣始能移師天柱著勞崇光等
迅派得力官軍駐往勦擊迅復城池毋得專待援師貽誤疆事其
天柱失守情形及文武下落並著查明具奏江西崇宜之賊堅踞
如故楊岳斌鮑超均已馳抵江右省城不難合力勦洗楚省東路
仍當嚴防竄突以備不虞將此由六百里各諭令知之○諭憚世
臨奏派委知縣呂鳳藻赴鎮筵押解田興恕並親筆作書宣布朝
廷德意令其不必懷疑自誤並訪知候補道王葆生向在湖南帶
勇田興恕係其舊部尙能相信復加委該道前往守催業於六月
初一日由呂鳳藻押解自鎮筵起程至四川秀山縣交替接解等
語田興恕既有熟識相信之人何以憚世臨不早爲籌計著卽密
派委員速行馳探田興恕何日到秀山交替沿途有無逗留並催
令呂鳳藻等小心護解不得稍涉大意到川後著崇實駱秉章派

員接解到省安爲羈禁迅速馳奏勞崇光張亮基於田興恕一事自己籌之至熟著遵照歷次諭旨將該革員應得罪名妥議具奏以便早爲完結將此由六百里各密諭知之○戊戌以孟秋時享

太廟

上前期親詣行禮○官文會國藩奏據曾國荃咨稱攻

克金陵詳細情形我軍自得天堡城後城中防守益密地堡城扼住要路百計環攻無隙可乘直至五月三十日始經李祥和羅逢元王遠和黃潤昌陳壽武熊上珍王仕益等率隊攻克占取龍膊子山陰居高臨下勢在掌握自六月初一日起各營輪流苦攻傷亡極多李臣典願率吳宗國等從賊礮極密處重開地道蕭孚泗黃潤昌熊登武王遠和願距城十數丈修築礮臺數十座通派各營隊伍刈割溼蘆蒿草堆掘山積上覆沙土左路地勢甚高利於直攻右路地勢極低利於潛攻如是者半月未嘗一刻稍休肉薄

相偏損傷精銳不可勝數陳萬勝王紹義郭鵬程等素稱驍將數日之內次第陣亡十五夜四更地道裝藥時曾國荃與李臣典正在洞口籌商一切忠酋李秀城突出死黨數百人由太平門傍城根直犯地道大壘別從朝陽門東角出數百人裝官軍號衣持火彈延燒各礮臺夜深幾爲所乘賴伍維壽李臣典黃廷爵張詩日堵住左路斃賊無算彭毓橘熊上珍陶立忠堵住右路擒斬亦多幸克保全洞口十六早嚮明曾國荃將四路隊伍調齊豫飭各軍穩站牆濠嚴防衝突惟將太平門龍脖子一帶自黎明攻至午刻李臣典報地道封築口門安放引綫曾國荃懸不賞之賞嚴退後之誅遂傳令卽刻發火霹靂一聲揭開城垣二十餘丈武明夏伍維壽朱洪章譚國泰劉連捷張詩日沈鴻賓羅雨春李臣典皆身先士卒直衝倒口而入左路城頭之賊以火藥傾盆燒我士卒死

者甚眾大隊因之稍卻經彭毓橘蕭孚泗李祥和蕭慶衍蕭開印
手刃數人由是弁勇無一退者而武明良伍維壽朱洪章劉連捷
譚國泰張詩日各率隊伍登龍廣山與右路太平門之賊排列轟
擊移時賊乃卻退李祥和王仕益從太平門月城攻入維時官軍
分四路勦擊王遠和王仕益同朱洪章羅雨春沈鴻賓黃潤昌熊
上珍進擊中路攻僞天王府之北劉連捷張詩日譚國泰崔文田
進擊右路由臺城趨神策門一帶適朱南桂朱惟堂梁美材亦率
隊從神策門地道之旁梯攻而入相與會合齊進鏖戰至獅子山
奪取儀鳳門其中左一路則有彭毓橘率羅朝雲趙清河黃東南
與武明良武明善武儀山由內城舊址直擊至通濟門左路則有
蕭孚泗熊登武蕭慶衍蕭開印率蕭致祥周恆禮李泰山蕭清世
蕭恆書朱吉玉趙太和劉長槐蕭上林分途奪取朝陽洪武二門

城上守陴城門守樓之賊及附近一帶賊隊悉被殲戮此十六日
地道成功城中鏖戰及東北兩路鈔剿之情形也方我軍大隊之
抵龍廣山也西南守陴之賊猶植立未動迨奪取朝陽門賊始亂
次而羅逢元張定魁彭椿年張光明楊西平何鳴高彭光友熊紹
濂羅興祥葉必信各率所部從聚寶門之西舊地道缺口仰攻而
入李金洲胡松江朱文光武交清劉湘南易孔昭戴名山張正榮
率隊從通濟門月城緣梯而上而陳湜易良虎易良豹龍清垣率
吳隆海張葉江晏恭山馮盛德陳汝俊劉定發各營則猛攻旱西
水西兩門月城僞忠王方率死黨狂奔將向旱西門奪路衝出適
爲陳湜大隊所阻遏乃仍轉回清涼山黃翼升率許雲發等水師
各營攻奪中關攔江磯石黑乘勝猛攻濱江之城遂與陳湜易良
虎奪取水西旱西兩門將守賊殲盡由是全城各門皆破大勢已

定日色將暝各戒所部嚴防賊衝彭毓橘扼守太平門黃潤冒王遠和朱洪章見星收隊結爲圓陣站立龍廣山稍資休息此水陸各軍攻克西南兩城及分守要隘豫防賊股衝突之情形也方朱洪章等與賊搏戰於僞天王府城北之時沈鴻賓周恆禮袁大升率隊從左路捲旗疾趨僞城之東設伏出奇爲掄渠埽穴之計乃朱洪章戰馬帶傷悍賊穩扼石橋我軍隊伍不能飛越城河遂繞僞城而行迨正兵收隊龍廣山而伏兵深入由僞城之東透迤而南不能撤隊時已三更矣僞忠王傳令羣賊將僞天王府及僞王府同時舉火焚燒袁大升周恆禮沈鴻賓見僞殿前南門突出悍賊千餘人執軍器洋槍向民房街巷而去知是洪逆竄至遂率隊腰截擊之殺賊七百餘人奪僞玉璽二方金印一方寬廣約七寸卽洪逆僭用之印也其僞宮殿侍女縊於前苑內者不下數百人

死於城河者不下二千餘人其時僞城火已燎原不可嚮邇街巷均已延燒官軍以暮夜路徑生疏不能巷戰遂收隊站城此十六夜攻破僞天王內城斃賊極多之情形也是夜四更有賊一股假裝官軍約千餘人向太平門地道缺口衝突經崑字湘後左右營截擊多用火桶火彈焚燒人馬死者已多約尚有六七百人騎馬衝出向孝陵衛定林鎮一路而逃伍維壽楊鉅南陶立忠急率馬隊跟追會國荃聞騎賊裝扮官軍逃出之信卽派張定魁李泰山黃萬鵬黃廷爵馬隊七百騎追之並飛咨溧水東壩句容各守將會合追剿直至十九日酉刻伍維壽黃萬鵬回營面稟追至純化鎮生擒僞烈王李萬材追至湖熟鎮見逃賊在前當經馬隊圍住全數斬刈又追至溧陽據百姓言前路並無賊蹤經過會國荃親訊李萬材供稱城破後僞忠王之兄巨王幼西王幼南王碇王崇

王璋王乘夜衝出被官軍馬隊追至湖熟橋邊全行殺斃更無餘孽又據城內各賊供稱首逆洪秀全實於本年五月間官軍猛攻時服毒而死瘞於僞宮院內立幼主洪幅瑱重襲僞號城破後僞幼主積薪宮殿舉火自焚應俟僞宮火熄挖出洪秀全逆屍查明洪幅瑱自焚確據續行具奏至僞忠王一犯城破受傷匿於山內民房十九夜蕭孚泗親自搜出並搜擒僞王次兄洪仁達二十日曾國荃親訊供認不諱其餘兩廣兩湖江北多年悍賊於十七十八等日經曾良佐周光正鄧吉山劉泰財聶福厚譚信高胡克安朱連甲王春華黎冠湘彭維祥陳萬合朱連泗謝三洪李臣榮彭玉堂劉金蘭分段搜殺三日之間斃賊共十餘萬人凡僞王僞主將天將及大小酋目約有三千餘名死於亂軍之中者居其半死於城河溝渠及自焚者居其半三日夜火光不息至十九日尚有

賊踞高屋之巔以洋槍擊官軍者此馬隊窮追逸出之賊及搜勦
首逆並羣賊之情形也見派營救火掩埋賊屍安置難民料理善
後事宜由曾國荃咨報前來伏查洪逆倡亂粵西於今十有五年
竊踞金陵亦十二年流毒海內神人共憤其蹂躪竟及十六省淪
陷至六百餘城之多而其中兇酋悍黨如李開芳守馮官屯林啟
容守九江葉芸來守安慶皆堅忍不屈此次金陵城破十萬餘賊
無一降者至聚眾自焚而不悔實爲古今罕見之劇寇然卒能次
第蕩平鏟除元惡臣等深維其故蓋由我 文宗顯皇帝盛德宏
謨早裕戡亂之本宮禁雖極儉嗇而不惜鉅餉以募戰士名器雖
極慎重而不惜破格以獎有功 廟算雖極精密而不惜屈己以
從將帥之謀 皇太后 皇上守此三者悉循舊章而加之去邪
彌果求賢彌廣用能斬除僭偽蔚成中興之業臣等忝竊兵符遭

逢際會既痛我 文宗不及目覩獻馘告成又念生靈塗炭爲時
過久惟當始終慎勉埽蕩餘匪以蘇子黎之困而分宵旰之憂此
次應獎應卹人員謹分別開列籲懇恩施臣國藩拜摺後卽行馳
赴金陵李秀城洪仁達應否獻俘俟到金陵後察酌具奏 上諭
內閣本日據官文曾國藩由六百里加緊紅旗奏捷克復江甯省
城逆首自焚賊黨悉數殄滅並生擒李秀城洪仁達等逆一摺覽
奏之餘竇與天下臣民同深嘉悅髮逆洪秀全自道光三十年倡
亂以來由廣西竄兩湖三江並分股擾及直隸山東等省逆蹤幾
徧天下咸豐三年占踞江甯省城僭稱偽號東南百姓遭其荼毒
慘不忍言罪惡貫盈神人共憤我 皇考文宗顯皇帝赫然震怒
恭行天討特命兩湖總督官文爲欽差大臣與前任湖北巡撫胡
林翼肅清楚北上游胡林翼駐紮宿松一帶籌辦東征事務復

特授會國藩爲兩江總督並命爲欽差大臣東征江皖賊匪號
令旣專功績日著十一年七月我皇考龍馭上賓其時江浙郡
縣半就淪陷遺詔諄切以未能迅殄逆氛爲憾朕以冲幼寅紹
丕基祇承先烈恭奉兩宮皇太后垂簾聽政指示機宜授會
國藩協辦大學士節制四省軍務以一事權該大臣受任以來卽
建議由上游分路剿辦飭彭玉麟楊岳斌曾國荃等水陸並進疊
克沿江城隘百餘處斬馘外援逆匪十數萬人合圍江南斷其接
濟本年六月十六日會國荃率諸將士克復江甯外城殲賊數萬
逆首洪秀全率其悍黨仍踞內城抵死抗拒茲復據會國藩奏官
軍自得天堡僞城後賊中防守益密五月三十日攻克占取龍膊
子山六月初一等日各營輪流苦攻李臣典等重開地道蕭孚泗
等修築礮臺肉薄相逼十六日黎明會國荃將四路隊伍調齊地

道火發揭開城垣二十餘丈李臣典武明良等身先士卒直衝倒口而入各弁勇蟻附齊進左路城頭之賊以火藥傾盆燒我士卒死者甚多大隊稍卻彭毓橋蕭孚泗等手刃數人由是弁勇無一退者武明良等率隊從龍廣山與右路太平門之賊排列轟擊賊始卻退李祥和等從太平門月城攻入王遠和等進擊中路攻僞天府之北劉連捷等亦率隊從神策門地道之旁梯攻而入相與會合齊進鏖戰至獅子山奪取儀鳳朝陽等門羅逢元從聚寶門之西舊地道缺口仰攻而入李金洲等從通濟門月城緣梯而上陟溪等各營則猛攻旱西水西兩門月城黃翼升等水師各營攻奪中關攔江礮石壘乘勝猛攻濱江之賊與陳湜易良虎等奪取水西旱西兩門由是全城各門皆破三更時僞天府及各僞王府同時火起煙燄蔽空洪逆率悍黨千餘人衝出僞殿前南門

竄至民房袁大升等率隊腰截斬七百餘名奪獲洪酋僭用僞玉璽二方金印一方四更後賊股千餘人假裝官軍號衣向太平門地道缺口衝突經崑字湘後等營截擊曾國荃加派馬隊追至純化鎮生擒僞烈王李萬材復追至湖熟鎮將逃賊全數斬刈無遺據曾國荃親訊李萬材供稱城破後僞忠王之兄巨王幼西王幼南王定王崇王璋王乘夜衝出被官軍馬隊追及將各頭目全行殺斃又據城內各賊供稱首逆洪秀全實於本年五月服毒而死瘞於僞宮院內僞幼主洪福瑱重襲僞號城破時洪福瑱積薪自焚李秀城一犯城破受傷匿於山內民房經蕭孚泗親自搜出並搜擒僞王次兄洪仁達其餘兩廣兩湖等處多年悍賊經各將士於十七八日搜殺淨盡三日之間斃賊共十餘萬人僞王僞主將及大小酋目約三千餘名無一得脫者此皆仰賴 昊蒼眷佑

列聖垂庥兩宮 皇太后孜孜求治識拔人材用能內外一心將
士用命成此大功上慰 皇考在天之靈下孚薄海臣民之望自
維藐躬涼德何以堪此追思 先皇未竟之志不克親見成功悲
愴之懷何能自己此次洪逆倡亂粵西於今十有五年竊踞江甯
亦十二年蹂躪十數省淪陷數百城卒能次第蕩平殄除元惡該
領兵大臣等櫛風沐雨艱苦備嘗允宜特沛殊恩用酬勞勩欽差
大臣協辦大學士兩江總督曾國藩自咸豐四年在湖南首倡團
練勦立舟師與塔齊布羅澤南等屢建殊功保全湖南郡縣克復
武漢等城肅清江西全境東征以來由宿松克潛山太湖進踞祁
門屢復徽州郡縣遂拔安慶省以爲根本分檄水陸將士規復下
游州郡茲幸大功告蒞逆首誅鋤實由該大臣籌策無遺謀勇兼
備知人善任調度得宜曾國藩著加恩賞加太子太保銜錫封一

等侯爵世襲罔替並賞戴雙眼花翎浙江巡撫曾國荃以諸生從戎隨同會國藩勦賊數省功績頗著咸豐十一年由湘募勇克復安慶省城同治元二年連克巢縣含山和州等處率水陸各營進逼金陵駐紮雨花臺攻拔僞城賊眾圍營苦守數月奮力擊退本年二月克復鍾山石壘遂合江甯之圍督率將士鏖戰開挖地道躬冒矢石半月之久未經撤隊克復全城殄除首惡實屬堅忍耐勞公忠體國會國荃著賞加太子少保銜錫封一等伯爵並賞戴雙眼花翎記名提督李臣典於槍礮叢中搶挖地道誓死滅賊從倒口首先衝入眾軍隨之因而得手實屬謀勇過人著加恩錫封一等子爵並賞穿黃馬褂賞戴雙眼花翎肅字泗督辦礮臺首先奪門而入並授獲李秀城洪仁達巨逆實屬勦勞卓著著加恩錫封一等男爵並賞戴雙眼花翎記名總兵朱洪章武明良熊登武

伍維壽均著交軍機處記名無論提督總兵缺出儘先提奏並賞
穿黃馬褂賞給騎都尉世職記名按察使劉連捷著交軍機處記
名遇有布政使缺出請旨簡放並賞加頭品頂戴賞給騎都尉世
職提督張詩日著以提督遇缺提奏並加恩賞給一等輕車都尉
世職記名消彭毓橘著交軍機處記名遇有布政使缺出請旨簡
放並賞給一等輕車都尉世職提督朱南桂蕭慶衍李祥和蕭開
印羅逢元均著賞穿黃馬褂賞給雲騎尉世職記名提督張光明
曾良佐均著加恩賞穿黃馬褂江南提督黃翼升著賞給一等輕
車都尉世職發去獎武銀牌四百面賞給有功將士李秀城洪仁
達二犯卽著會國藩等派委委員檻送京師訊明後盡法處治洪
秀全屍身覓獲後挫屍梟示仍傳首被害地方以洩眾憤○諭本
日據官文會國藩由六百里加緊馳奏克復江甯全股悍賊盡數

殲滅洪逆自焚並生擒李秀城洪仁達等逆已明降諭旨將會國藩曾國荃及單開平逆首功之總兵李臣典等酬庸錫爵並沛恩綸因思軍興以來各路統帥疆臣公忠體國共濟時艱督飭官軍掃穴擒渠將各路逆氛次第掃蕩江甯賊勢日孤卒就殄滅見在紅旗奏捷東南軍務即可從此底定良由各該統帥疆臣不分畛域同心勦賊調度有方尤宜特加異數以昭恩渥欽差大臣科爾沁博多勒噶台親王僧格林沁前在直隸山東殲除髮逆林鳳祥李開方等復帶兵勦除捻匪肅清直隸山東河南全境並督師皖北將張落刑苗沛霖等股勦滅近復移紮豫皖之交扼勦東竄援賊良由該親王忠勇性成不避艱險軍麾所蒞威望允孚僧格林沁已屢次加恩晉封親王世襲罔替著再施恩加賞一員勒令其子伯彥諾謨祐受封欽差大臣大學士湖廣總督官文徵兵籌餉

推賢讓能克復楚北郡縣多處肅清全境並籌辦東征軍務接濟
餉需不分畛域實屬盡勤卓著著加恩錫封一等伯爵世襲罔替
並加恩將其本支毋庸仍隸內務府旗籍著擡入正白旗滿洲賞
戴雙眼花翎江蘇巡撫李鴻章統領中外水陸各軍由上海一隅
轉戰而前連克蘇常府縣並派兵出境攻拔嘉興等處見復協剿
湖郡扼守高溧一帶使江甯逆匪進無援兵退無竄路實屬謀勇
兼優著加恩錫封一等伯爵並賞戴雙眼花翎陝甘總督楊岳斌
統帶曾國藩所立水師自九江克復東流建德協克安慶府城並
攻拔池州無爲銅陵等處扼守江路斷賊接濟實屬勳績懋著著
加恩賞給一等輕車都尉世職並賞加太子少保銜兵部右侍郎
彭玉麟前在江楚等省屢著戰功及與楊岳斌同領水師疊克魯
港南陵蕪湖金柱關銅城牯東西梁山等要隘招撫高瀍溧水降

眾克復東壩肅清江面實屬勇敢有爲著加恩賞給一等輕車都尉世職並賞加太子少保銜四川總督駱秉章前在湖南巡撫任內薦賢使能勦辦團練克復城池其於楚師餉項盡心籌畫不遺餘力及擢任四川總督後復督飭官兵殲滅石達開等逆首洵屬老成持重懋著公忠著加恩賞給一等輕車都尉世職並賞戴雙眼花翎署浙江提督鮑超前在江楚屢克名城肅清江西轄境及隨征東下疊克甯國府石埭太平涇縣及河西等隘並復江浦浦口九洑洲本年復克東壩句容金壇等處使江甯蘇常之賊不能聯爲一氣厥功甚偉著加恩賞給一等輕車都尉世職西安將軍都興阿前在揚州督兵屢殲悍賊埽除天長六合各路竄匪督率水師嚴扼江面兇雖督師甘肅而從前所立之功自不可泯江甯將軍富明阿前在蒙城力除苗匪見在接辦江北防務力遏竄賊

並派兵渡江協克丹陽均著加恩賞給騎都尉世職廣西提督馮子材督辦鎮江軍務數年以來固守名城剿除竄賊本年復會同江北官軍克復丹陽並著加恩賞給騎都尉世職署京口副都統魁玉幫辦鎮江軍務協同守禦甚爲得力著加恩賞給雲騎尉世職漕運總督吳棠勦辦清淮一帶竄匪並埽除徐宿捻逆地方賴以安謐著賞給頭品頂戴仍交部從優議敘閩浙總督兼署浙江巡撫左宗棠前在湖南軍營運謀決勝迨抵浙江後統領各軍將各該郡縣及杭州省城次第克復見惟湖州府城未克指日全浙廓清再當渥加懋賞杭州將軍國瑞在僧格林沁軍營幫辦軍務打仗得力殺賊甚多江西巡撫沈葆楨籌解會國藩餉需源源接濟均無貽誤見在勦辦撫建等處賊匪調度得宜勞勩卓著均著俟江皖浙等省軍務平定再行加恩至楊岳斌鮑超此次雖已加

恩仍俟江皖肅清同膺上賞其餘各省統兵將帥其各慎勉圖功
迅殲醜類廓清疆圉共荷恩施有厚望焉○諭自粵逆洪秀全糾
眾煽亂闖入兩湖三江盤踞江甯遣黨肆擾疊陷郡邑荼毒生靈
罪惡貫盈神人共憤朝廷命將出師特申天討屢經克復城池殄
除巨股而該逆蔓延既廣兇燄遂張自咸豐十一年八月間克復
安慶省城後官軍乘勢直逼江甯賊勢漸形窮蹙上年以來屢將
江蘇浙江各郡縣次第克復江甯之賊遂成孤立而逆酋洪秀全
等猶敢擁眾負隅抵死抗拒今幸將士用命克拔堅城元兇授首
從此掃除餘孽指日蕩平嘉與溥海蒼生共享昇平之福此皆仰
賴 昊蒼眷佑 列聖垂慈得以建此偉績宜修告成之典用昭
寅感之誠所有 天壇 地壇 社稷壇盛京 三陵 東陵
西陵 太廟均著遣官告祭朕於告祭之前一日親詣 太廟

殿 後殿拈香行禮並飭所司於祝文內敬舉受釐宣捷之忱用
申虔告所有應行禮儀及此外一切典禮著各該衙門敬謹詳察
例案具奏○諭本日江甯省城克復捷書馳奏八表同歡因思前
此賊氛擾及數省官兵所至仰賴山川效靈 神祇助順用能師
行貞吉耆定功成允宜修舉明禋敬答鴻佑所有各省應祭 嶽

瀆諸神著禮部查議具奏○諭 皇考文宗顯皇帝御極之初

卽值粵逆倡亂流毒各省疊次命將出師用申天討雖屢殄悍寇
克復多城而匪勢蔓延未卽撲滅我 皇考宵旰憂勞無時不以
滅賊安民爲念殷殷望捷迨咸豐十一年 龍馭上賓頒示遺詔
猶以東南諸省軍務未平百姓蕩析離居時厯 聖慮朕誕膺大
統乾惕時深日盼殲誅渠魁廓清疆宇仰承 皇考未竟之志我
兩宮 皇太后親裁庶政教育朕躬翹望捷書夜以繼日茲於本

月二十九日由官文曾國藩等紅旗報捷克復江甯剷除首逆是
皆仰賴我 皇考貽謀久遠故能勉集大勳用光 前烈感幸之
餘彌深悲慟卽擬親謁 殯宮敬申哀感我 慈安皇太后 慈
禧皇太后因秋禾正當暢茂蹕路所經車馬殷闐不免蹂踐田禾
一切修墊道途恐致重煩民力卽日恭奉 懿旨著派醇親王奕
譔恭詣隆福寺行宮 几筵前恭代行禮敬舉宣捷之忱用申虔
告○諭見在江甯克復全省底定朕於七月初一日先行親詣
奉先殿 大高殿 壽皇殿行禮景山 關帝廟拈香用申敬悃
○諭軍興以來十有餘載從前在事諸臣爲國 勤矢志滅賊或
積勞身故未竟全功或臨難捐軀無虧大節類 卓著勞績爲我
國家有功死事之臣見在江甯克復首逆殲除該故員等裔志以
終未克躬逢其盛追懷忠盡良用惻然宜加身後之榮以表生前

之績著議政王軍機大臣查明從前已故有功諸臣開單呈覽候旨施恩○諭見在江甯克復首逆殲除所有一切加恩事件及應辦各事宜均須次第舉行著議政王軍機大臣查明嘉慶道光年間勦滅三省教匪及平定回疆 加恩諭旨成案敬謹繕寫呈覽○諭議政王軍機大臣等本日據官文曾國藩由六百里加緊馳奏克復江甯全股悍賊悉數殲滅一摺覽奏之餘實深欣慰已明降諭旨宣布普沛恩綸矣粵逆久踞江甯負隅抗拒實爲從來未有之悍寇此次水陸各軍於溽暑炎蒸之際猛力環攻迅克堅城悍黨悉除渠魁就縛非曾國藩運籌決策督率有方曾國荃等躬冒矢石鼓勇先登末由建此奇功成乃丕績朝廷嘉悅之懷實難盡述除曾國藩等已加恩錫封外其餘出力員弁兵勇並著查明保奏候旨施恩發去銀牌四百面著曾國藩曾國荃等擇其功績

最著者先行頒給以勵戎行各路賊匪皆視金陵爲趨向此時巢穴既覆則其餘竄逸之賊自必聞風喪膽僧格林沁見已移紮光州官文度亦進至黃州卽著妥籌會剿督率官軍將麻黃一帶賊氛乘勝掃蕩悉行殄滅毋令竄突會國藩奏稱擬卽前赴江甯察看情形日來計已駐師白下卽著將一切善後及撫卹難民各事宜次第籌辦廣德等處如尙有踞賊會國荃尙須駐紮江甯卽由會國藩派撥兵隊乘勢掃蕩毋稍遲緩其逆首李秀城洪仁達等均係內地亂民不必獻俘第該逆等罪惡貫盈自應檻送京師審明後盡法懲治以洩神人之憤著會國藩遴派妥員將李秀城洪仁達押解來京並咨明沿途督撫督飭地方文武多派兵役小心護送毋稍大意髮捻各逆尙應集於黃麻之交奔竄靡定會國藩赴江甯後安慶地處上游控制皖南皖北不可無大員鎮撫卽著

彭玉麟駐紮安慶妥籌防剿如髮捻有東竄之信卽飭防守要隘各軍實力迎擊痛加剿洗俟會國藩回安慶後彭玉麟應赴何路助剿屆時由會國藩酌量辦理江甯克後羣醜就殲雖無逸出之賊而楚皖之交賊氛尙熾下游防守不可稍鬆著富明阿懷遵前旨暫緩前赴江甯仍督水陸各軍嚴密防守天六等處毋稍疏懈如江甯滿城善後各事必須大員料理卽著魁玉先行前往隨時與富明阿咨商辦理李鴻章馮子材魁玉仍飭丹旬等處防軍嚴防湖州一帶竄逸之匪盡力截殺毋令紛竄並著李鴻章將王永勝等軍調回長興協攻湖郡左宗棠當督率各軍會合蘇師迅將湖州安吉之賊全行殄滅克復堅城毋令一賊上竄楊岳斌抵江省後所籌進剿機宜動中窾要著與沈葆楨會商妥籌迅將崇仁等處踞賊竭力掃蕩此時江甯已復匪勢瓦解乘勝進兵自收破

竹之效該督撫等務當同心勦力迅掃機槍奠定東南渥膺懋賞
有厚望焉其徐宿一帶防守事宜著富明阿咨商吳棠妥籌辦理
將此由六百里加緊各諭令知之○諭恩麟奏北路回目縛賊獻
城一摺據稱北路回目張保隆震懾兵威稟請投誠本年四月間
自帶所部賺開固原城門殺賊無算生擒逆賊花萬六等八名並
將鹽茶廳城一併收復等語同情狡詐反覆無常惟觀此次該回
目殺賊獻城情節似尙可信或因官軍克復平涼震懾兵威因而
潛消反側亦未可定著恩麟飭令該回目將所獲逆匪花萬六等
八名解赴省城訊明正法仍當隨時察看防其中變毋得稍涉大
意墮其詭謀雷正綰等攻克平涼後已移得勝之師進攻固原見
在固原鹽茶已復平郡邈北賊氛漸戢即可直指靈州都興阿前
奏擬由磴口進兵當經諭令都興阿雷正綰合力前進直擣甯靈

卽著該將軍等懷遵前旨妥速籌商以期節節掃蕩迅殄逆氛甯
夏回目馬化澂旣遣回人馬精忠呈繳鎮道印信並約期繳獻郡
城其事雖未可深信若能暫示羈縻紓我兵力亦不妨從權辦理
前因熙麟奏甯夏逆匪畏罪投誠當經諭令都興阿雷正綰酌度
辦理而慶昫復有中衛縣逃北大堡中馬化澂張貼僞示歸罪赫
文典之奏是甯夏回匪尤爲詭譎恩麟等尤須慎之又慎不可稍
爲含胡希圖了事如可暫加籠絡卽咨明慶昫妥籌辦理都興阿
雷正綰專辦甘省軍務均屬責無旁貸將來或剿或撫進止機宜
卽著隨時察看酌辦如鹽固投誠尙可不至反覆卽不妨予以自
新以期併力北征別無牽阻將此由六百里諭知都興阿雷正綰
並傳諭恩麟知之○予江南陣亡總兵官郭鵬程副將陳萬勝參
將熊祖泗等祭葬世職○是月蠲免福建建甯等十九縣暨邵軍

汀軍等兩同知泉上等五縣丞所屬被擾上年額賦